

三軍鎮撫所令三軍已革改稱五衛鎮撫所內禁衛不隸五衛其節制使六人稱內禁衛將與五衛將一樣設衙門每番二將并率司禁直宿扈 駕時受 點一五衛都鎮撫印大將之印義興衛將之印龍驤衛將之印虎賁衛將之印忠佐衛將之印忠武衛將之印內禁衛將之印各鑄一顆以給一宣傳官鎮撫部將依臺省政曹例子孫襲蔭一衛將陪令史各一陪皂隸各一驅使各三隨廳令史十使令十螺匠三一部將陪令史各一陪皂隸各一驅使各二隨廳令史五使令五螺匠二一宣傳官驅使各二隨廳令史六使令七 從之○乙未 命桂陽君璿鈴川府院君尹師路 傳于承政院曰日本國王今請五萬緡錢而政府以為可給二千緡政院以為可給三千緡皆臨時酌量之言非據其舊例而言也今雖從請後亦有請五萬緡錢至多不可盡從其考前例以啓○丙申 御思政殿設夏享祭飲福宴宗親寧海君以上議政府堂上鈴川君尹師路工曹判書楊汀及承旨等侍日本國王使者僧全密等大內殿使者德模等亦侍

宴宴初 上陞御座宣傳官擊鼓如常祭例世子與宗親宰樞
凡侍宴者分東西入就殿庭行四拜行五爵而罷 賜上副官
人虎皮各二張豹皮各二張十升白綿紬各五匹十升白綿布
各五匹寯席各二張又撤宴卓 賜之并官醞三十瓶禮曹判
書洪允成啓曰今 賜宴卓分送兩處為難請加 賜酒肴使
大內殿使者詣日本國王使者下處同飲 上曰可 命賜楮
三口海菜二盤酒三十瓶○禮曹啓成均館堂上官郎官同坐
訓誨學生其坐次不可與他司同兼司成資憲則北壁嘉善則
東通政則西坐交倚自大司成至注簿西壁後行坐繩床 從之
○丁酉日暈有兩珥○明使別宣慰使都承旨韓明澮辭 命
判內侍府事田昫賫酒饌餞于洪濟院并 賜內女樂 命臨
瀛大君瑆桂陽君瑄義昌君五密城君琛往祭○領議政鄭麟
趾掌庚午年文科試取權肇等肇至是為吏曹判書率同年投
呈名族麟趾設慶席 上聞之命左副承旨韓繼美 賜宣醞
并 賜樂同副承旨金礪亦肇同年故承 命往赴肇初不屑

補官年過三十尚耽學不拘小節風流文雅傾儕輩亦不習場
屋小藝及談論國家事語若懸河議論風生與韓明澮結為刎
頸之友嘗遊覽佳山勝水輒留忘返時人目為白衣宰相擊在
在場屋試官金宗瑞在堂上當午瞌睡忽驚悟使人往問第若
于坐者誰使者回報曰擊也宗瑞曰異哉此人吾睡欲覺時忽
見黑燄當頭上射天文餘果何異也擊卷在第五 文宗命置
第一○掌令金命中持黃州記官李元山妻訴其守令狀告啓
曰諸邑之吏陰噬村民訴守令者間或有之未有親告者今黃
州之吏自匿其身而使其妻訴守令元惡莫甚此風不可長也
請鞫之且其所告非其寃抑亦無關係然不可不問并鞫本州
守令 從之○戊戌謝恩使閔騫來復 命○內資寺尹趙安
上書略曰司憲府以臣為曾奸本寺婢收告身鞫問是偏聽族
親陰噬挾私劾之非奸所捕獲且事在赦前深有閔焉命下其
狀于司憲府 傳曰大抵奸事率多曖昧憲司彈劾亦或過中
須要明白鞫問得情以啓大司憲金淳請避嫌 傳曰無傷也

勿避予亦意謂趙安未免也○兵曹據慶尚右道處置使李士
平啓本啓船軍當番上時則乘船習戰而帖戶之在家者及番
休者依陸地馬兵例每於中翼習陳大抵船軍非馬兵陸地習
陣非其本務而番上番下皆事習戰未得休息儻有邊警則船
軍皆當合番守禦而陸地習陣往還之間恐不及赴請除陸地
習陣從之○己亥御思政殿世子與內宗親吏兵曹堂上
都鎮撫衛將承旨等人侍進數爵上曰今日宗親欲進豐呈
予將入內卿等勿罷去命世子與翼峴君璉迭行酒及夜而
罷○延昌尉安孟聃加綏祿大夫柳江同知中樞院事孟孝苗中
樞院副使特加漢城小尹宋衣兼判官權城各一資有本府訟
者上言云本府積年留滯事衣與城處決如流使冤抑待伸請
加超擢以旌之故有是命○初慶尚左道處置使宣炯啓臣
見諸浦船軍率皆老弱不解操弓本道近於島倭倭人近因國
家撫恤雖革面歸順然小不如意輒發憤言鍊武備邊不可小
弛本道久無警急民物苟安不尚武事船軍則分二番備三丁

為一戶輪次立番故一人立番一年內不過一二月雖令習射
未能慣熟脫有事變實為無用叅詳景泰五年二月兵曹受
教擇船軍壯實者定為戶首每當番除率丁常令戶首番上如
有身病不得已事故然後代以率丁壯實者洪武二十六年十
一月受 教倭賊稍息專賴兵船而守令不顧大體致船卒虛
踈將來可慮自今不時摘莪其闕軍守令一人答一十每一人
加一等罪至杖八十闕十人者杖一百罷職其立法非不至也
而守令視為常事專不奉行每當遞番之時諉諸該吏率以迷
弱黷送闕者亦多備邊虛踈誠非小失 上曰國之大事在祀
與戎安不忘危盛必慮衰况國家四境皆受敵軍政不可不嚴
衣東西兩界例守令殿最時怠忽軍務者置之下考以勵軍務
命吏曹議之吏曹啓元典考察之法至為詳悉而但無褒貶憑
考之法守令以此不用心請自今守令殿最必考本邑船軍壯
弱及番上無闕 從之○戶曹啓京中諸司官更不計遠慮所
儲之物不分新陳混置一庫舍舊用新因此舊者漸至陳腐終

為無用今後祭享及進上外諸處支用並皆用舊畜新違者當
該官吏及監察啓聞科罪從之○庚子以延慶為中樞院事
辛碩祖吏曹叅判河漢慶尚左道慶置使李昇平全羅道都節
制使○辛丑夜流星出織女色赤狀如小瓶○壬寅御思政
殿受常叅視事仍設酌上酒酣命領議政鄭麟趾起舞大
司憲金淳對舞仍傳于兵曹叅判具致寬曰予於軍政致慮
夜不安枕雖至於醉亦未忘也麟趾因論易理顧問淳及魚孝
瞻皆對以不知麟趾啓曰為文臣而不知易當罰之以酒上
出所製慕世宗詩以示麟趾麟趾即和進曰更令文臣和進
上曰然予以詩示諸臣似乎誇張無乃若陳後主隋煬帝乎
麟趾對曰陳後主隋煬帝吟風詠月而已今主上製詩思慕
先王何自比陳隋上曰今日飲酒無乃甘酒嗜飲乎麟趾對
曰小臣每聞聖上於大內不進酒如今日則與羣臣飲况在
坐者皆功臣歡飲何有不可上曰昔漢高祖待韓信彭越何
如麟趾舉首大笑對曰待韓信彭越十分好聖上夫豈不知

臣敢謂 上不知而更論是非乎 上亦大笑顧淳曰爾嚮者論婦女上寺予好佛之主也然婦女上寺所當禁也麟趾曰上前日下旨云鳶飛戾天魚躍于淵此語極好宜各自異處麟趾扶醉而出○兵曹啓凡外方習陣時其未及軍士皆直行決罰而甲士列侍衛則必須啓聞然後科罪不宜遠道徃復今後請以違令笞五十直斷 從之○司憲府啓前行司勇趙孝禮遭母喪纔過小祥謀欲赴試招致八十老父構辭上言罪應杖八十 上以功臣之子命只收告身○初濟州敬差官金自行馳啓曰前濟州牧使崔守平買部民金元金金尚老張明蒙金大塊等馬又部民宋繼武之馬初以進上烙印而終以其馬私換請鞠之 命下義禁府義禁府啓崔守平罪應杖八十徒二年黥面 命除黥面杖八十徒二年○癸卯慶尚道大丘人裴碩亨上書曰臣於乙亥八月蒙賜見未悉敷奏願更於 御前獻言 上曰予前日已見之狂妄人也何必更見○甲辰上御思政殿內宗親都鎮撫衛將部將鎮撫宣傳官兵曹參議

韓終孫承旨等侍食 上曰部將金嶠嘗以駕前訓導從我觀
獵適有一獐至嶠誤抽撲頭矢射之獐仆而走若以金鏃射之
則必獲矣嶠於射獐尚恟烏得為部將 命桂陽君 傳于諸
將黜之何如諸將合辭對曰嶠恟於射獐則豈宜領兵請黜之
上曰嶠雖失於射獐然其為人也赫爾等所及也○日本國
肥前州一松浦三栗野太守源滿薩摩州日向太守藤原盛久
各遣使來獻土物○乙巳 上幸峨嵯山觀獵○進鷹使孫蕃
先來通事唐夢璋啓曰明使翰林院修撰陳鑑太常寺博士高閏
去三月晦時發北京○丙午進賀使左叅贊黃守身禮曹參判
閔瑗平壤宣慰使漢城府尹李純之辭 上御思政殿設小酌
世子與臨瀛大君璆桂陽君璿義昌君玗密城君琛翼峴君璉
寧海君瑋永順君溥延昌尉安孟辨鈴川府院君尹師路河城
尉鄭顯祖都鎮撫衛將部將鎮撫宣傳官承旨等入侍 命守
身及諸宗宰以次進酒中樞院副使康袞進酒 上謂宗宰曰
袞予之赴京時從事官也都鎮撫盧叔全進酒次進于世子

上謂世子曰叔全汝師傅當別飲大爵純之進爵 上曰爾 世
宗朝老成之臣多我得而有之乃賜鞍及弓矢賜守身鴉青紗
團領一領草綠羅帖裏一領白苧布帖裏一領及笠靴弓矢等
物閔瓊鴉青紗團領一領苧布帖裏一領及靴弓矢等物 命
叔全講諸將陣法已時守身等奉表箋如大明蓋賀皇太后中
宮正位宮壺皇太子復位也其表曰聖神誕作光膺寶命之申
典禮俱新茂迎瑤圖之慶見聞所暨欣抃惟均欽惟剛健粹精
聰明睿智養以天下重逢長樂之歡教自周南復闡關雎之化
且正元良之號俾專監撫之權景祚益延純嘏駢集伏念猥將
庸質幸際昌辰迹滯東藩雖阻叅於漢殿心懸北闕竊效祝於
華封方物表曰天命用申俾舉彝典壤奠斯執恭陳賀儀謹備
黃細苧布二十四匹白細苧布三十四匹黑細麻布三十四匹龍文簾
席二張黃花席二十張滿花席二十張滿花方席二十張雜彩
花席二十張雜色馬二十匹右件物等產自遐陬製匪良匠豈
足充旅庭之實聊以效獻芹之誠皇太后及中宮禮物紅細苧

布各二十匹白細苧布各二十匹黑細麻布各三十匹黃花席
各一十張滿花席各一十張滿花方席各一十張雜彩花席各
一十張箋曰寶冊揚徽既正位於貳極銅闈受賀得歡心於萬
方邦本益隆皇圖永固恭惟資凝岐嶷性稟英明承額兩宮長
奉怡愉之樂備德三善載膺監撫之權緝禮斯稱頌聲交作伏
念邈處荒服幸際昌辰阻叅百辟之班倍上千齡之祝禮物白
細苧布二十匹黑細麻布五十匹鳳文簾席二張黃花席一十
五張滿花席一十五張雜彩花席一十五張人參五十觔○司
憲府啟江原道大昌道察訪尹禮卿前任京畿江原道程驛察
訪時驛吏所貢神稅布五十匹私自濫用又斂殘驛吏綿布等
物私贈原州訓導朴瑞男前副使李紬春川訓導鄭云潔幼學
姜一從採訪別監金彌壽前副正黃坤禮卿陪吏禮生假勢恣
惡潛通官妓贈遺公物無所畏忌實為元惡雖經赦宥不可不懲
請收禮卿告身其受賂人等并論以贓吏禮生承屬殘驛吏
贈遺之物依律區處且請停輸大昌平陵道神稅布從之

命勿以賊吏論○日本國對馬島宗盛弘遣使來獻土物○義
禁府啓洪重孫崔賜起禹守老黃孝恭柳壽黃允誠郭安邦李
處義趙慶珪李三老奉忠孝李宗讓申允底河紹義李承命洪
係江洪禹明朴素曹繼門朴子暎朴如祝李世樑薛成林等以
掌兵鎮撫編迎餞致賀聚會又賜起重孫等夜會女妓淚江梅
家前護軍金致身盧定之前司正張和行司勇崔千齡成大生
李石公行司正李樑材中樞李守善等與掌兵鎮撫屢會罪續
典云常時無兵曹明文而私聚軍士者皆以謀逆論大明律凡
謀反及大逆者不分首從皆凌遲處死父子年十六以上皆絞
十五以下及母女妻妾祖孫兄弟姊妹若子之妻妾給付功臣
之家為奴財產并入官賜起指謂兵曹判書云世間翻覆難知
罪比罵制使及本營長官律杖一百女妓淚江梅含笑蓬萊
仙降蓬萊帶露花醉西施玉油蓮待好星詠桃夭等與重孫等
聚會罪違令答五十命致身定之大生只收告身發配外方石公
樑材千齡和三老忠孝承命紹義只收告身外方充軍守義收

告身外方安置重孫賜起并杖一百永屬遠方官奴籍沒賜起家產宗讓允底素孝恭守老免誠係江禹明成林如祝繼門慶珪慶義疇安邦世樛子映及女妓等並勿論○丁未日本國對馬州宗盛家遣使來獻土物○己酉兵曹啓諸將軍士侍衛合行事件一當直都鎮撫二著甲冑出番都鎮撫宣傳官部將及司僕官皆佩劔侍衛一當直宣傳官立形名在處一大小朝會日駕前形名在思政殿門外繳扇南待 動駕侍衛先導 還宮時亦止思政殿門外若 御勤政殿則月臺上勤政門則階下路臺上忠義衛奉持侍立一御勤政門時軍士不宜皆出門外侍衛令內禁衛全數銃筒衛二百各分左右 命將具甲冑夾輦侍衛 陞座時三分之一在門內三分之二出門外 還宮時如前侍衛一五衛軍士各其將著甲率領庭列一部將所管軍士中有應相避者換差一部將不可無箇月以十五日為期一部將箇滿去官時除顯職勸勵一衛將部將及軍士賞罰平時不可悉論以法凡犯軍令死罪者軍士則杖九十衛將部將則

杖六十論斷一部將統衆任重請於東西班叙用使不失祿一部將殿最則兵曹同都鎮撫衛將鎮撫殿最則兵曹同都鎮撫等第一每行幸時侍衛步兵統將臨時受點差定從之○傳旨刑曹曰曾下旨除別進上今全羅道都觀察使宋處寬別進乾魚卵其劾以啓○初前中樞院副使柳守剛上書言臣嘗任江陵府於嶺東防禦之事耳聞目擊謹條陳一本道都節制使營及三陟杆城鎮但口傳軍士二三人赴防巨鎮踈虞且三陟蔚珍相距遙隔故於中間沃原驛築城以驛丞兼差千戶之任然不置守城軍卒有名無實請自今諸邑軍士依咸吉道安邊以北軍士例勿屬侍衛牌及加定軍以閑良通政未滿六十以下及下番甲士別侍衛銃筒衛防牌六十歲自募學生人等試才分屬都節制使營及三陟杆城沃原等諸鎮其中自募赴防滿三十朔者除散官職以實防禦其上京侍衛牌未充者以京畿忠清兩道加定軍充數二江陵連谷浦海口水淺石露其餘諸浦海口亦皆填沙成岸脫有事變兵船出海及期應敵為

難江陵安仁浦內淵闊可以多泊兵船且距十餘里地人民密
居防禦似緊而無兵船連谷浦在四十餘里三陟浦在一百四
十里相距不遠請革此兩浦合安仁浦以江陵船軍屬之使防
禦便易無裹糧之弊又罷填沙諸浦兵船依平安道口子例木
柵石堡漸次造築其沿邊草人亦使撤去使其萬戶陸地防禦
一本道之兵非但本道防禦儻有北門之變先為赴援而不別
置都節制使以觀察使兼之設使觀察使在嶺西而嶺東有變
則及期救援無由且都節使營在江陵窄狹頽毀軍器衣甲與
火藥雜置不特火災可畏造作年久日漸蠹損將為無用請分
授諸鎮軍士令漸次修補又別設都節制使巡行諸邑整點兵
器以固防禦一江陵人言牛山茂陵兩島可以設邑其物產之
富財用之饒如楮木苧桑大竹海竹魚膠木冬栢木栢子木梨
木柿木鴉鵲黑色山鳩海衣鰻魚文魚海獺等物無不有之士
地膏腴禾穀十倍他地東西南北相距各五十餘里可以居民四
面險阻壁立千仞而亦有泊船處水路則自三陟距島西風直吹則

丑時裝船亥時到泊風微用櫓則一晝一夜可到無風用櫓亦
二月一夜可到伏望設縣邑擇人守之 命兵曹議之兵曹啓
第一條江原道都節制使本營三陟杆城沃原諸鎮防禦事及
侍衛牌移定等事則咸吉道軍士本不番上乃於本道赴防故
雖當番休之時亦令輪次赴防江原道別侍衛甲士則皆京中
番上不可依咸吉道例番休時又令赴防且本道防禦視他道
不緊其赴防自募人散官職除授至為猥濫而移定本道侍衛
牌於京畿忠清道亦為不可第二條填沙諸浦兵船革罷木柵
石堡造築草人撤去等事內草人則祇却敵之器撤去為便其
諸浦則當時雖無邊警事變之來亦所難測未可只以浦口填
沙遠罷兵船第三條軍器分授軍士修補都節制使巡行修整
等事以軍器散授軍士不合事體觀察使之兼任節制使行之
已久別無巨弊不須別設第四條牛山茂陵兩島懸邑設置事
兩島水路險遠往來甚難海中孤島設邑持守亦難其上項條
件並勿舉行但本道人民不無流寓兩島之衆請待風和時遣

朝官刷還其填沙諸浦內兵船專未出入處令其道觀察使審
度移泊處以啓 從之但兩島深寓者勿令刷還○庚戌日暈

御思政殿受常參視事臨瀛大君璆永膺大君琰桂陽君增

義昌君五密城君琛翼峴君璉鈴川府院君尹師路兵曹參判

具致寬都鎮撫衛將部將宣傳官承旨等侍食因設酌 傳三

為部將宣傳官者當別行注擬爾等各盡心力以副予意仍

命左承旨曹錫文傳于部將等曰大抵儒術以心武事以力爾

等何以哉部將等對曰臣等亦以心 上曰為之乃何對曰各盡

其心 上曰盡心不同至於盜賊亦皆盡心爾將盡心於何事

對曰臣等盡心於忠孝 上曰老翁在家亦有忠孝之心爾等

所謂忠孝何異於是儒者用心極為精微非爾等所可及也為

爾之道莫若智也爾當盡心於此對曰臣等濫叨領衆之官固

當盡心訓練以効力 上曰爾等効力雖殊而其致則一也予固

知爾等之心也但戲之耳 命居下坐者進酒宣傳官高壽永

在下坐進酒 上曰爾亦言之對曰儒者用心處臣固不可及矣

然亦盡心於武事耳。上曰汝之言是也。顧謂諸將曰爾等亦各行酒于諸宗親宰樞。○吏曹啓百官別加資一時特恩而代職加資或待子孫年長或以他故累年不即代受而到今請代者多非但參考無據不即敬依特恩不可且去官衙門及成衆官故為遲留欲待去官而受請年久別加資並勿除授其景泰六年閏六月以後別加資限今夏等都目除授去官衙門及成衆官等去官後勿追授。從之。○辛亥御思政殿受常參視事大司憲全淳啓曰近日崔賜起洪重孫之罪不以。祖宗成憲繩之臣以為私聚軍士以謀逆論者不必情見而後置法但私聚則坐之防微杜漸而已此人等雖置於法皆不足惜請斷之以法上曰重孫等有微勞且人命至重其勿言。○禮曹啓唐曆及鄉曆相違處與陰陽學提調參考諸書云伏者陰氣將起迫於殘陽不得上升為藏伏立秋金代火金畏火故庚日必伏庚者金也其日夏至後第三庚為初伏第四庚為中伏立秋後初庚為末伏無立秋日庚則以立秋日為末伏之語今書雲觀

依曆要以立秋日庚為末伏然曆要乃書雲觀傳授私記多有舛錯曾下旨勿用而書雲觀據以參定可以治罪事在赦前姑置勿論定望則日出入隨處各異故八月定望分中朝則在日出分已下退一日本國則在日出分已上不退故定望不同請望則依鄉曆以十六日伏則依唐曆以十九日為定頒行中外從之○癸丑司憲府啓凡功臣妻妾犯罪而冀免其罪者非一然無立法未敢處決今考大明律名例八議三曰議功注云有大勲勞銘功大常者右律應議者之父祖有犯條凡應入八議者之祖父母父母妻及子孫犯罪定議奏聞取自上裁據此參詳婦女從夫者也而所生子孫則並蒙其蔭獨妻妾未蒙有虧令典自今功臣祖父母父母妻及功臣子孫犯罪者依律文免罪其有子息之妾并許免罪以廣盛代懋賞之典從之○甲寅上觀獵于峨嵯山○乙卯日暈○御後苑觀射設酌○掌令金命中將本府議啓曰有男女七八人乘醉彈琴唱歌相與戲舞行過闕門於大都中略無畏忌臣等在府聞之拿致請鞫

之傳曰大抵細民不憂愁則歌何敢使民困苦而不喜樂乎
予於前日不禁細民會飲已下旨爾等何擅便拿致以啓命中
啓曰不啓拿致臣實有罪又啓曰今年早曠兩麥未秀年甚凶
歉物價踴貴臣以為禁酒為便傳旨義禁府曰掌令金命中
違逆教旨擅作威福責問之時抗拒爭論殊無敬心其推鞠以
聞時禁令頗闊巫風盛行都人士女羣飲無厭每一置酒必大
張樂比日暮罷歸男女歌舞呼喚街巷彌大平樂事自貴家婦
人亦多做効大設帷帳悉集子婦爭豪競侈營辦極備杜鵑花
開時尤多名曰煎花飲○吏曹啓諸邑守令以書負無定額多
占閑良人民任情使喚請依日守之數留守府五十大都護府
牧官者護府四十郡三十縣二十以為定額其有民丁數少軍
額未充者不必充額從之○丙辰日暈○御慶會樓下觀射宗
親及花川君拉恭兵曹判書洪達孫禮曹判書洪允成知中樞
院事朴董當直都鎮撫朴炯康衮衛將沈安義柳河朴居謙左
承旨曹錫文左副承旨韓繼美同副承旨金磻八侍分左右較

勝否 賜勝者蓑衣各一領○吏曹啓新設五衛五部每衛
隨廳令史十衛將陪各一每部隨廳令史五部將陪各一宣傳
官令史六以曾革忠武等五司書吏移屬但五司書吏時仕數
少姑以時數移定其未充者以新屬人充定每一年五人依鎮
撫所典吏八品去官 從之○傳旨吏曹曰外方守令內堂上
官除六暮用三十朔○丁巳日暈○義禁府啓掌令金命中罪
應坐不敬特命 宥之只令左遷其與議執義金係熙掌令權
衡持平金琦並勿論○遠接使戶曹判書朴元亨啓臣伏審黃
海道呂嶺洞仙敬天站移排之地宜置呂嶺站于鳳山舍龍洞
距劔水站三十五里洞仙站于鳳山八石里距舍龍洞四十
里敬天站于黃州貯福里距入石里四十餘里但劔水站在前
黃鳳州經由使客來往而已今移呂嶺等三站則平安道來往
者皆由劔水路以見在站吏七名必不支當請以附近諸邑公
處奴婢及人馬分田量數定給待人馬阜盛後三站移排 命
下兵曹議之兵曹啓三站移排請依啓本施行其奴婢及分田

等事委主掌官磨勘施行 從之○前中樞院事田興平興南陽人以吏胥事 太宗于潜邸及即位錄原從功臣歷仕 世宗朝位至樞密至是卒年八十二謚敬胡夙興恭事敬彌年壽考胡有子五人稼生桐止登第○刑曹啓前此諸邑人吏告公賤漏落者賞以典農寺奴婢但漏落奴婢多年避役雖還屬本司不過年收貢布而典農奴婢則素困於役一朝屬之諸邑必至重困今後賞給除典農寺奴婢以漏落奴婢計口充賞 從之○戊午 御勤政門受朝絲日本國對馬島宗貞盛使者時羅多羅等二人肥前州上松浦山城太守元吉使者可文都老等二人一岐州呼子源高使者和知羅沙也文對馬州護軍中尾彈正等二人隨班○御慶會樓下觀射臨瀛大君璆永膺大君琰桂陽君增翼峴君璉密城君琛義昌君玗寧海君瑋花川君權恭坡平君尹巖右贊成申叔舟知中樞院事朴董刑曹判書成奉祖兵曹判書洪達洪達孫禮曹判書洪允成工曹判書楊汀德寧府尹康袞中樞院副使朴炯左承旨曹錫文右承旨尹子雲左副承旨韓繼美右副

承旨權塾同副承旨金礪上護軍林自蕃等八侍命分左右較勝
否 賜勝者權恭鹿皮一領角弓一張餘皆油氈一部○己未
承政院 奉旨馳書于廣州牧使曰令將片脯二十脰乾雉二
十首乾水魚十尾燒酒五瓶付前署令崔承宗賜瑜許令承宗
相見○司憲府啓內資寺尹趙安奸本司婢牛知至以所騎之
馬付牛知家喂養且牛知供詞云奸趙安時寺奴同三石崇等
窺見安及同三石崇等匿不承服請收安告身并事干人拷
訊得情 命下義禁府鞫之○庚申世子出獵于箭串○以任
元濬為司憲掌令○辛酉流星見坤方色青狀如小瓶○知司
諫院事徐岡上書曰臣以庸劣小儒曲蒙 聖恩備位諫官日
夜常懼不稱其職今又過聽家奴叫賊之語輕舉妄作以干邦
憲自分當坐重典幸賴 聖慈曲 貲棄垢匿瑕許復舊職 聖
息如天祚臣墮首乃能上報也第念諫負其選甚重臣以負罪
之軀醜面冒居心實未安且外間之議謂臣為私庇家奴此尤臣
之所羞赧愧怍而無以自明者也伏望 命罷臣職以示公道留

中不下○慶尚道觀察使啓請以梁山渭川驛屬彥陽德川驛以輪山黃山兩驛移直中央合為一驛以金山文山驛屬金泉驛以尚州龍山驛屬洛平驛以昌原安民驛屬熊川報平驛以金海省法驛屬南驛以密陽良洞驛屬龍駕驛如此則道里均平并力服役於公私為使命兵曹議之兵曹啓驛路相距率以三十里而上項各驛或七里或八里程途不均有乖置驛本意請依啓本施行從之○壬戌日暈○以事目下禮曹一御前雖因事毋得背坐立一命台時倍加奔走一大駕過時介冑將帥軍士外佩劍者皆跪雜類及宦官皆俯伏使客禮接時亦依此例一上與宗親尊長勳舊老大臣展私禮對跪時世子以下皆避席俯伏一御前無私禮一若有賜膳賜物即叩頭而受若命勿改御器即依命一闕內胡跪已有禁令然至今因循殊無敬上之意自今一皆痛禁一舊例饌幔施于太平館西庭地窄今後移設太平館西門外一上與使客接待時大小執事之人不顧品秩失序雜處者窺見者無所事立見者並皆痛禁

一殿庭左右侍衛軍士若蒙賜酒饌皆跪受○禮曹據全羅道
觀察使啓本啓本道岳海瀆名山大川祈雨祭香祝幣令騎馬
人下送觀察使擇日精備奠物祈禱且於祀典所載外他靈驗
處并行祈禱修淨溝洫從之○日本國對馬島宗盛職宗虎
熊瓦一歧州真弓兵部少輔源永各遣使來獻土物○五月癸
亥朔○甲子日本國對馬島宗盛家遣使來獻土物○乙丑傳
旨禮兵曹曰予欲振文風武氣作育人材植國家之根本儒生三
通易圖說者武士彎弓百三十斤者方許赴試不必備額隨材
多少試取 命藝文提學金末中樞院副使金鈞分掌講書○丙
寅遣導官注薄姜叔卿于忠清道察救荒諸事又遣議政府知
印徐濟安謹孫于京畿審察播種救荒等事○丁卯親行獻
陵英陵端午祭遂觀獵于定今院西山回至三田渡於船上設
酌隨駕宗親及宰樞入侍○戊辰日暈○幸慕華館文武百官
侍衛日本國王使者僧全密永嵩等九人大內殿多多良教弘
使者僧德模等八十餘人亦侍衛將試武舉聞海陽大君睿宗

諱
違豫即還駕命留左副承旨韓繼美同副承旨金礪及左贊
戎申叔舟兵曹判書洪達孫禮曹判書洪允成兵曹參判具致
寬兵曹參議韓終孫兼知兵曹事權愷判內侍府事洪得敬置
酒慰倭使令武士射伏騎射○戶曹據慶尚道觀察使牒呈啓
今年本道凶歉鹽夫等時方絕食不得出力莫鹽請依前例蠲
三兩月貢鹽 從之○己巳日暈○傳旨戶曹曰義倉之設本
欲賑貧乏今聞京居富強者或暗請執吏賑貸之際富強者為
先多得以為酒肉之資甚者用為貨殖貧乏者朝夕待哺無所
依托終至飢餓有違義倉本意自今敢有如此者其執吏及官
員並以制書有違律論罪去年失農京外穀貴飢民丐乞者多
外方則已令諸邑列置賑濟場京中則宜分送東西活人院賑
恤但慮貧民惡與病人雜處因而逃散可於普濟弘濟利泰院
等三處別置賑濟場差人監掌又令五部官吏每日輪次往來
檢覈違者科罪○傳旨禮曹曰闕內供上及京外公處勿用酒
民間用酒勿禁○庚午進鷹使孫蕃賫欵賜三表裏回自大明

○慶尚道賑恤使判中樞院使李仁孫來復命○右獻納尹孝孫將本院議啓曰取人慶事也今當憂旱時不宜輒行請待秋傳曰今當憂旱故慮有人材淹滯而有是舉不可停也孝孫更啓曰取人必有慶賀遊街等事糜費不貲傳曰大事已定不可停也○日本國使者僧全密永崇惠光等奉書于禮曹曰臣等辱隨 殿下玉輿而遊于城外勝地山岳鐘秀衣冠濟濟是天
下壯觀而希世之寵也無勝激切感戴之至頓首再拜所憾
殿下無宴而回御轅臣等不幸不知所以白留大人奏樂使臣
等侍于宴郵及射御神兵之伎藝亦越乎恒品者也惶恐億千
視今比古雖如帝堯仁政周禮樂漢威儀孫吳兵良之御基之
射太史公文章亦何差其肩速歸吾邦而語寡君且喜且羨乎
伏願大人察臣等情拜稽首禮曹以啓 上覽之命示申叔舟
○兵曹啓前此凡軍士率以一年相遞立番其受料甲士攝六
十防牌近仗則以無故三十日有故五十日別侍衛則以無故
五十日有故百日定限其後更定以四月相遞立番而限日仍前不

改懶惰之徒憚於留京故待限日至番休臨近現身纔過十餘日以此宿衛虛疏今後受料受祿軍士以無故十五日有故四十日以前衛軍士無故二十日有故五十日定限其限內不現身仕上直者依前例作散充軍 從之○禮曹啓今當盛農累月不雨請就祀北郊京畿岳海瀆名山大川降香祝幣祈雨又遍禱典祀外靈驗處 從之○辛未舍人李弼將堂上議啓曰

世宗朝以旱氣禁民間用酒犯者罰有差今旱氣如此已禁公處用酒勿禁私用民之無遠慮者不顧家產致富家所為勉強用酒糜費不貲不可不禁傳曰予姑思之其待之○承政院奉旨馳書于慶尚道觀察使曰道內順興安置瑜成陽安置玦及妻各處送夏衣其考同封事目給付且給營所 在油菴各二張又馳書于全羅道觀察使曰道內錦山安置瓔任實安置瓊光州安置鄭棕及妻各處送夏衣考同封事目給付且給營所 在油菴各二張○兵曹啓本曹及鎮撫所衛將文字相違無格例諸衛部將或用平關或牒呈似為無據請今後本曹及

鎮撫所則平關相通衛將則於本曹及鎮撫所牒呈 從之○
壬申太白晝見雨○禮曹判書洪允成啓曰 上方憂旱至於
輟膳雩北郊而雨喜慶莫大願進酒傳曰常時嘗不用酒對大
臣宗親姑用之仍御思政殿召允成及義昌君五都鎮撫朴炯
右承旨尹子雲右副承旨權摯同副承旨金礪入侍行三爵而
罷 上曰允成請進酒故姑從之 賜允成蓑衣弓箭帽毛馬粧
等物○日本國薩州伊集院軍鎮隅州太守藤熙久及對馬州宗
盛家各遣使來獻土物○癸酉太白晝見○命名還義州宣慰
使中樞院使金何以禮曹參判盧叔全代之叔全即辭命付笠
帽六事扇子二十把汗帖裏四領苧布帖裏二領拂子四事毛
馬粧油鞍籠弓箭帽蓑衣各二件分賜陳鑑高閏扇子十二把
笠帽四事分贈頭目○刑曹啓盜賊科罪之法累次受教科條
甚多外方官吏眩於施為若不通論指示則恐失立法本意依
前受教竊盜賊滿十貫以上為首者及牛馬賊為首者勿論宰
殺與否處絞有若白晝搶奪盜倉庫錢糧一應犯盜計賊科罪

者賊滿十貫則為首者依上項例處絞為從及未滿十貫者答杖徒流各從本律施行一貫以上黥面未滿一貫者膊上刺字再犯則通計赦前處絞律文內稱以監守自盜論者不拘此例但元典內無識之人稱農牛老病賣於韃鞮禾尺者其賣者及韃鞮禾尺皆以宰殺牛馬律論罪身充水軍今盜殺牛馬為從者依本律施行則買殺者及重盜殺者及輕輕重失宜請以盜殺牛馬為從者依元典買殺例決杖一百身充水軍從之○甲戌太白晝見○上親策取吳凝等十三人策曰書曰以閏月定四時成歲而不言置閏之月歲終節季置之若何今置閏無定者何也予未知同異及用之便否在前作三軍其將帥統而合之者多以所屬偏裨多故也其於推闡委任之策何者是予未知同異及用之便否古聖制五音後世有七音之說從古乎則何則從今乎則何則予未知同異及用之便否諸葛亮作八陣李靖製六花陣劉裕用步兵唐宗選千騎古之名將所為如此其於強弩勁馬之勢何者是予未知同異及用之便否義則何

圖禹因洛書程欲免文可作八卦此外又有可據者乎予未知
同異及用之便否右五條皆子等所嘗熟讀者也不通物理未
可與論道子等各悉心以對予將親覽焉○乙亥以金宗淑金
係熙僉知中樞院事李誠長行司憲執義○日本國對馬州倭
護軍六郎洒文來獻土物○兵曹啓甲士別侍衛辛未壬申兩
年加資則勿論當下番已皆除授已巳甲戌兩年加資則各於
當番亦已除授乙亥年加資別侍衛則丙子九日當番甲士則
今年五月當番各以其番之數除授而其中甲士別侍衛或以
不緊事故不番上或呈都目者以別加為無益謀欲代受父兄
子弟故為遲留或四五年或七八年然後欲代授者多年久之
事檢覈為難其乙亥年以前加資依吏曹受教並勿除授乙亥
年以後加資限今年六月都目除授從之○丙子太白晝見
○丁丑親行健元陵望祭遂觀獵于峨嵯山○戊寅右獻納
尹孝孫啓曰今旱氣太甚請依舊例遷市閉南門行蜺蜺祈雨
命只行蜺蜺祈雨○刑曹據兵曹受教關啓平安道館路大同

館則非他館之例元屬奴子三十餘口且在平壤府城內與本府衙前官奴相助立役不可贈給其餘諸館則各以附近諸邑亂臣奴婢定給生陽安定肅寧安興嘉平新安車輦所串等館各五口雲興義順等館七口林畔館八口良策館六口隨其殘盛定給其諸館所在諸邑亦以其附近住居諸司奴婢各十口定給令其邑守令給閑曠土田撫恤安接其察訪不完恤以致逃散者觀察使啓聞科罪且私賤逃止本道者亦令觀察使推刷從本主情願以下三道亂臣奴婢相換量給諸館役使從之刑曹又啓全羅道觀察使宋處寬不奉 旨擅進乾魚卵請

上裁施行 命勿論○己卯 上幸慕華館宗親文武百官

隨駕日本國工使者僧全密永嵩及大內殿使者僧德模等七十二人序立於慕華館前道左迎駕 上御帳殿設宴試武舉妓工人奏樂舉人與侍衛司僕官內禁衛宰樞之有武才者分左右射候行三爵而罷○庚辰 御思政殿親講武舉士自願一書取魚得海等十三人○舍人李翊將本府議啓曰今當大

旱愚民不謹天戒相與會飲糜費不貲請禁民間用酒 從之
傳于司憲府曰旱深所當戒謹修省之時迷惑小民携壺出郊
恣飲放逸自今五月二十一日在家飲酒外携壺者一禁○傳
旨議政府曰今當農月雨澤愆期慮有滯獄以致愁怨今五月
十八日以前京獄除十惡及強竊盜外徒以下囚人保放推問
答以下雜犯勿論公私罪並許原免○義禁府啓內資寺婢牛
知初諱奸趙安事狀今雖承服前後異辭必有情由趙安聞人
言自己奸事即與同僚言說而不辯明又車有精與牛知言某
是汝夫安聞之亦不辨明安與牛知以為平問不即輸情請拷
訊得情 命勿論只收安告身○辛巳太白晝見○諭諸邊觀
察使曰今當憂旱審理冤獄最是切務向予不得親審八道罪囚
正卿用心之時也十惡及強竊盜外徒以下囚人保放推問答
以下雜犯勿論公私罪諭書到日並皆免放且速決獄囚毋使
淹滯徵贖貧民所難堪宜諭諸守令務要寬貸其中苛刻多所
徵贖者卿即啓聞予於此時觀卿之効力不然難致天地之和

命義禁府放行護軍朴允昌妻貴德貴德本悍戾無比脅制
允昌奴使之允昌瞎一目新構屋蓋瓦纔畢允昌與妻議置窓牖
處意不合貴德罵允昌曰瞎漢瞎漢爾其解事歟手執長竿撞
碎簷瓦曰爾既忤我作此何為堂室窓壁推碎無餘其悍戾如
此凡僕隸之有小失者輒加拷掠因而死者非一奴婢疾如仇
讎家有一奴稍壯美貴德寵使之有一婢聲言與奴私貴德即
搏殺其母子事覺見囚允昌主辯其誣獄官笑曰閨中事密君
亦安能盡保其無他歟允昌指瞎目比引無方哀動左右時人
笑之至是以早見放○壬午問禮官判司宰監事鄭軾辭○以
朴居謙為中樞院副使南景祐慶州府尹魚得海僉知中樞院
事吳凝司諫院左正言○忠清道觀察使啓兩澤愆期去四月
五日十日二十七日暫雨五月八日九日洒雨後至今不雨請
祀典所載名山大川降香祝祈雨從之○癸未太白晝見○
放文武科榜○司憲府啓永柔縣令朴汝亨以官鹽貿部民麻
以為私用計贓未滿二貫罪應杖八十刺字從之命除刺字

○刑曹據全羅道觀察使啓本啓羅喇船軍朴忠蒿三私奴本致慚前牧使枉刑謀欲報復以部民擅搜守令行裝罪應杖八十且續典品官吏民告其守令者非關係○宗社安危及非法殺人勿受杖一百流三千里破家黜鄉瀦宅而忠等所犯已經赦宥不可如法論斷然以部民謀陷守令聚人成郡帶弓矢刀子追至他邑劫掠行裝敗毀風俗頑惡莫甚不可不懲請於江原道全家徙居從之○甲申禮曹啓國家厚待倭野人曲加懷綏所經諸邑守令以為異類支持諸事略不致意甚為不可且日本國王大內殿使者則已令所過諸道觀察使一度親自慰宴而觀察使委之差使負以致踈略有違交隣懷遠之意自今觀察使有故不得接待則具由啓聞如有不用心支持守令本曹檢覈啓聞罷黜從之○司憲府啓廣巖萬戶張文孝橫斂船軍布貨雜物贈遺官妓又令船軍崔深等輸至京家以資私用自知賊滿罪重將告身逃匿首鼠待赦殊無士行其所犯皆已經赦但綿布十九匹米六十六斗盜用在赦後罪應杖

一百流三千里刺盜官物三字以在逃收贖錄賊吏案永不叙
用待捕執雖經赦收告身刺字以戒後來其盜用已現雜物令
主掌戶曹區處 從之○禮曹啓 太宗大王後宮除稱懿嬪
宮請依慈壽宮壽成宮例稱寧壽宮 從之○吏曹啓平安道
都節制使營知印元數五十每式年二人去官咸吉道都節制
使營知印元數亦五十而每式年一人去官請依平安道例每
式年二人去官且前此平安道都節制使知印左右道各五十
今已合一道請以五十定額其餘五十革罷平安道都觀察使
營知印四十府知印四十每式年四人去官咸吉道都觀察使
營知印九十每式年二人去官非徒額數不同去官之數亦異
請依平安道例以營知印四十府知印四十定額每式年營知
印二府知印二并四人去官 從之○乙酉太白晝見○丙
戌太白晝見○傳旨禮曹曰諸道進上膳羞 大殿中宮東宮
當以次第差等封進或進東宮而不進中宮或多少顛倒其移
文諸道俾之詳審○兵曹啓太一曆筭官及太一習筭局所業

不異獨衙門稱號各異曆筭官元額六內司直遶兒一習筭局
別監元額六內副司直遶兒一訓導二然曆筭官但以兵曆推
筭送兩界為任今無此事可革曆筭官六合屬習筭局其別監
訓導所任不異請皆稱訓導以副司直遶兒相遶受祿從之○
咸吉道觀察使馳啓曰咸興以南諸邑自四月以後雨澤未洽
請於名山大川降香祝祈雨 從之○丁亥日暈○御思政
殿受常叅內宗親寧海君以上領議政鄭麟趾雲城府院君朴
從愚領中樞院事尹師路右贊成申叔舟判中樞院事李澄石
判敦寧府事宋珖壽兵曹判書洪達孫中樞院事金何兵曹叅
判具致寬左承旨曹錫文右承旨尹子雲左副承旨韓繼義右
副承旨權摯及日本國王使者僧全密永嵩等二十六人入侍
命皆上殿置酒行五爵而罷又 命於賓廳賜全密等宴○戊
子初奉常判事李芮以宣慰日本國王使者往慶尚道偕來
至是使者諸往芮家因贈芮段子一匹命以濟用監十升麻
布二匹報之○平安道別宣慰使都承旨韓明澮來復 命○諭

八道觀察使曰古朝鮮秘詞大辯說朝代記周南逸士記誌公
記表訓三聖密記安舍老元董仲三聖記道證記智異聖母河
沙良訓文泰山王居仁薛業等三人記錄修撰企所一百餘卷
動天錄磨虱錄通天錄壺中錄地華錄道說漢都識記等文書
不宜藏於私處如有藏者許令進上以自願書冊回賜其廣諭
公私及寺社○日本國王使者全密等辭為書以答曰朝鮮國
王奉復日本國王殿下海天遼邈音徽阻隔忽承辱价禮意交
至深慰不已我國與貴國世敦隣好以孤不德幸蒙天之力初
定國亂即位日淺未遑通問以講信義為愧來示重新佛刹欲
得錢為資但本國錢幣不行已久公私所儲不敷謹收若干緡
錢庶助萬一弘揚法教彼此一致隨喜隨喜特送大藏經令部
以備潘閱并將不腆土宜就付來使聊表禮信冀領留聞貴國
畫屏畫扇製造甚精沉香雕佛尤所珍妙如以見惠豈不幸哉
餘真珍重自愛大藏經一部石燈盞五事鞍子一面諸緣具白
細綿紬二十四匹紅細苧布一十匹白細苧布二十四匹黑細麻布

二十匹滿花方席一十張滿花席一十張雜彩花席一十張銅錢一萬貫人參一百觔松子五百觔五味子五斗清蜜二十斗豹皮心虎皮邊獾皮裏坐子一事藍斜皮一十張豹皮一十張虎皮一十張摺扇一百把油芫一十張牛黃一十部乾虎臟五十二箇乾虎骨四十二箇乾虎肉四百七十條乾虎肋肉帶骨六部乾虎腎兒二部乾虎脚肉帶骨四箇○己丑太白晝見○會僧徒一百八人于興天寺祈雨 命左副承旨韓繼美行香禁諸司刑戮屠殺○命右副承旨權摯賁乾獐四口片脯八十八脰乾雉四十首往開城府宣慰明使○御札付速接使朴元亨一聞陳鑑等自處知禮事事瑕疵若有更張之言當答曰我國故事如此吾等何敢擅便更改有 殿下之命然後改之耳鑑等若曰啓 殿下則當答曰啓之矣一雖小碎之事不當之事極難之事皆啓一聞鑑等曰事大之誠既已矣而宜盡迎詔禮度子謂此儒等徒知班超之使外國宣漢德能以口舌順服夷狄故意謂如彼也若鑑等後發如此言說則卿等勿勤勤發明

我國盡禮之事但曰自有前例一雖有據理可答防遼之事一
無爭論皆推 殿下○庚寅雨 上喜命賜興天寺祈雨僧一
百八人各絹一匹幹事僧二十人加賜黑麻布一匹○日本國
對馬島宗盛家一岐州上松浦重實各遣使來獻土物○問禮
官鄭軾來復 命○辛卯 御思政殿視事領議政府事鄭麟
趾領中樞院事尹師路右贊成申叔舟吏曹判書權擘兵曹判
書洪達孫知中樞院事朴董李崇之工曹判書楊汀吏曹參判
辛碩祖兵曹參判具致寬漢城府尹李純之承旨等待食 上
曰久旱祈禱得雨是天人相感處且凡物皆受天理故雖微物
皆知天變予於後苑見蟻羣聚數日今果雨麟趾曰昔程子以
為人於萬物中最多事而不知若萬物則全受一理故預先知
會巢知風穴知雨是也○傳旨戶曹曰今聞黃海平安道之地
有平衍膏腴迺袁州郡而居民鮮少農力不裕不能開墾遂使
莫大之利置之無用予甚慮焉其議開墾興利官民便用節目
以啓○壬辰 諭義州牧使李茵曰本州一國初面巨鎮近來

凋弊予欲使之阜盛未得其策今聞卿興利除害庶務修舉一新部內予甚嘉悅卿其知悉益勵不怠以副予意

世祖惠莊大王實錄卷第七

[Faded vertical text columns containing the main body of the historical record.]

世祖惠莊大王實錄卷第八

六月癸巳朔日暈○御思政殿 設宴慰倭使世子率宗親寧

海君以上左議政鄭昌孫領中樞院事尹師略雲城府院君朴

從愚延昌尉安益聃右贊成申叔舟兵曹判書洪達孫吏曹參

判辛碩祖兵曹參判具致寬大司憲金淳工曹參判安崇孝戶

曹參判魚孝瞻刑曹參判黃孝源都鎮撫尹巖權恭權擊朴薑

成奉祖洪允成楊汀盧叔全李興商奉石柱朴炯衛將朴居謙

李延孫宣錫年權軀李埤兵曹參議韓終孫知兵曹事權愷大

內殿使送德模等二十六人行四拜各就坐 命德模通譯准

爵酒行五爵而罷前夕通譯贈海陽大君諱濟宗以紫石硯是日

命典籤賈虎豹皮各一張藥囊一事報之○都承旨韓明澮

賈宣醞往迎明使于碧蹄驛○開城府別宣慰使權摯宣慰使

右參贊朴仲孫來復 命○甲午彗星見○命右贊成申叔舟

右副承旨韓繼美判事梅祐侍 世子習明使相會禮○傳旨

禮曹曰鑄佛法僧三寶之印送砥平龍門寺○乙未彗星見○

明使翰林院修撰陳鑑太常寺博士高閏賈 詔勅來 上具
冕服率百官出迎于慕華館如儀至 景福宮頒詔其復位詔
曰朕昔恭膺天命嗣承大統十有五年民物康阜不虞北虜之
變惟以宗社生民之故親率六師禦之而以庶弟郕王監國不
意兵律失御乘輿被遮時又武羣臣既立皇太子而奉之豈期
監國之人遽攘當宁之位既而皇天悔禍虜酋格心奉朕南還
既無復辟之誠反為幽閉之計旋易皇儲而立己子惟天不祐
未久而亡杜絕諫諍愈益執迷矧失德之良多致沉疾之難療
朝政不臨人心斯憤迺今年正月十七日朕為公侯駙馬伯及
文武羣臣六軍萬姓之所擁戴遂請命于聖母皇太后祗告天
地社稷宗廟復即皇帝位躬理樂務保固邦家其改景泰八年
為天順元年大赦天下咸與惟新於戲多難興邦高帝脫平城
而肇漢殷憂啟聖文王出羗里以開周天位既復於其正人心
由是以咸安咨爾萬邦臣民同秉忠誠會歸皇極弼予政理永
享大平布告中外咸使聞知建儲詔曰朕惟帝王之傳序乃國

家之大經建元良所以尊宗廟而重社稷封羣胤所以壯藩屏
而隆本支今古攸同典章斯具茲朕躬膺天命之申復登大寶
之位顧惟不腆事猶未遑而公侯駙馬伯及文武羣臣僉謂朕
之元良當復正于東宮其次諸子宜悉封于藩國朕以請之聖
母皇太后允從衆議舉行盛禮乃於天順元年三月初六日冊
元子見濡為皇太子及封第二子見潏為德王第三子見湔為
秀王第四子見澤為崇王第五子見浚為吉王於戲承桃主器
得其人則國本正而萬邦以貞胙土疏封守其世則藩輔完而
大統以定天下之心斯有所繫 宗社之計永底于安故茲詔
告咸使聞知 勅曰朕恭膺上天申命復登大寶爰建皇儲嘉
與多方宜敷恩澤矧爾玉國世篤忠誠賚與之儀尤所當厚特
遣正使翰林院脩撰陳鑑副使太常寺博士高閏齋詔勅諭王
並賜王及妃錦幣表裏至可領受王當體朕至懷秉禮服義益
堅藩屏之誠共享大平之福故諭賜國王紵絲骨朶雲大紅一
匹骨朶雲黑綠一匹細花大紅一匹素礬紅一匹素栢枝綠二

匹骨朶雲深青一匹骨朶雲翠藍一匹細花深青一匹素深青
一匹錦毬文寶相花深青一段毬文花栢枝綠一段連勝寶相
花深青一段壽帶寶相花大紅一段綵綃紅五匹藍五匹王妃
紵絲細花大紅一匹細花深青一匹素深青一匹細花深挑紅
一匹細花翠藍一匹素栢枝綠一匹錦毬文寶相花大紅一段
連勝寶相花深青紅一段彩綃紅三匹藍三匹鑑等往大平館
命都承旨韓明澮禮曹判書洪允成問安 命赦境內其

教曰欽惟 皇帝陛下應天順人復正帝位又立 皇儲頒恩
四域宜體至仁用布寬典自天順元年六月初三日昧爽以前
除謀反大逆謀叛子孫謀殺歐罵祖父母父母妻妾謀殺夫奴
婢謀殺主盡毒魘魘謀故殺人但犯強盜外已發覺未發覺已
結正未結正咸宥除之敢以宥旨前事相告言者以其罪罪之
於戲奉天心而育物式固永遠之基敷皇訓以推恩庶廣大平
之慶故茲教示想宜知悉○午後 上具大駕儀仗前後鼓吹
詣大平館設下馬宴妓工人奏樂行九爵而罷○丙申彗星見

○命都承旨韓明澮右議政鄭昌孫問安于明使自後日遣承旨宰樞問安 命右承旨曹錫文往大平館告陳鑑等曰今日殿下欲早來見也昨與大人飲酒頗困日午當來見鑑等曰知道我輩亦未醒耳日午 幸大平館設翌日宴 上行酒 世子及宗親各以次行酒九行而罷○傳于禮曹曰頭目高得舉求四書大全可送迎接都監○丁酉日暈太白晝見夜彗星見○命判內侍府事洪得敬賫鹿脯乾雉乾大口魚石首魚松魚新黍米分贈兩使自後每五日例贈食物○明使詣成均館謁聖禮訖坐明倫堂生貢進士幼學四百餘人分東西序立行拜禮明使呼東西行頭生貢贈以鮮魚二盤黍米一盤館伴戶曹判書朴元亨禮曹參判盧叔全及左贊成申叔舟禮曹判書洪允成兼成均司成金鈞金末等入謁行禮叔舟告明使曰殿下聞大人謁聖遣臣輩來耳俱各就坐行茶禮畢高閏執筆出題義題三一日道千乘之國敬事而信節用而愛人使民以時二曰夫子之不可及也如天之不可階而升也三曰文莫吾

猶人也躬行君子則吾未之有得詩題曰謁先聖廟對句曰森
森松栢參天茂雨露栽培天上恩波闊乃令諸生製述明日送
館命左承旨曹錫文賫宣醞肉物贈陳鑑等遂設酌鑑作詩
曰凌晨齋潔拜彤墀數仞墻高未易窺近向此時追上古直從
中國到邊夷開來繼往初何自振土聲金更有誰况是我朝文
教遠也應無處不宗師鑑等還大平館命以黃鼠毛筆一百
四十枚龍煤十笏銅鑪具紫石硯二事白麻骨紙二千幅紫燒
酒二壘青橘二櫃分贈之○吏曹啓冰庫別坐舊以二周年為
限限滿適代今請用一周年從之○戊戌太白晝見夜彗星
見○世子宴明使於大平館明使南向世子西向坐世子行酒
坡平君尹巖花川君權恭知中樞院事金何右叅贊朴仲孫兵
曹判書洪達孫禮曹判書洪允成戶曹叅判魚孝瞻以次行酒
而罷○命左承旨曹錫文賫儒生所製詩文禮曹佐郎權得經
率諸生詣大平館得經告兩使曰諸生將所製詩文來矣兩使
曰有司者可將來即以詩文進呈而退鑑等各執筆科次○

己亥陳鑑等遊漢江登濟川亭 命文官金守溫徐居正金壽寧
等與都監設宴數酌而罷遂乘舟順流而下使漁人打魚鑑等
采甚將鯉魚二尾授司饗官進上 命禮曹判書洪允成同副
承旨金碩經到露梁灘上邀謁鑑等遂同舟緩掉而下至龍山
灘下遇雨相與賦詩舉酒相屬至加乙頭捨舟而上禮賓設宴
碩以宮醞魚肉餽鑑等允成以下各以次行酒○日本國肥前
州上松浦寶泉寺住持源祐位對馬島宗盛家宗盛弘宗貞國
各遣使來獻土物○庚子彗星見○辛丑日暈○傳于禮曹曰
比間事務繁劇限明使回程停常參○壬寅彗星見○御思政
殿臨瀛大君璆永膺大君琰義昌君五當直都鎮撫衛將承旨
侍食 命都承旨韓明澮賫彩花席十六張油籠四十事油氈
四部理馬諸緣二部石燈盞二事扇子一百把分贈兩使○禮
曹正郎禹繼蕃有酒失醉則昏而不省是日因監明使宴享醉
酒還家路逢迎接都監使趙肅生妻騎馬過行以為妓也令皂
隸曳下皂隸曰非妓也乃良家婦人也繼蕃叱曰彼無襪裙而

乘者非妓耶妓安得無禮於禮官耶亟令捽髮鞭之肅生以啓
命義禁府鞫之時肅生妻遭箠失魂絕久乃甦命遣內醫
及女醫護視史臣曰舊俗婦人出則乘兜子外施帷帳使外人
莫敢窺其乘馬者亦施面紗束以襪裙今人例從苟簡徃徃便
衣卷面紗恬不為恠流俗之弊一至於此然則辱趙妻者非繼蕃
使酒而已實趙家自辱也繼蕃嘗與文松壽躡躑相埒一叙則一
罷先是松壽得敘繼蕃曰松壽出吾當省矣未幾有是事士林
笑之○日本國王使船主道幸致書于禮曹曰蓋聞交易通有
無之道取諸易噬嗑也周立市易司以均平市政唐置市舶使
以納海國之商厥利不唯助國用寬民力而已懷遠之德興而
同仁之術暢矣豈以義之和而利之以禮節之歟若反之以賤
買貴賣之汚利而為利則噬嗑一卦可削也歲之乙亥敝邑馳
信舩於本朝吾民為商者承命而駙焉所捆載物若干萬其半
已轉運于都下都下之商人欲賤買之而吾商有拔本失利之
患故欲貴賣之兩商之噬嗑猶豫未決有司宜從周而均平之

秋也抑復滯貨之在蕃浦者銅二萬一千二百斤丹木一萬一
千斤鐵五千九百斤累累然棄拋于海畔不啻及溝中斷也凡
托生命於一板凌不測之鯨波待得來者豈有他哉唯利是得
也今利之不得也乃不遑患之如之何其使吾賄至此棄指
之極也邪楚材晉用郢鼎魯納者古之義談也竇幸本朝舉唐
之典差市舶使納之振官財以支給其價誠若此則吾產即本
朝之貨也有吾商即本朝之氓也可憐焉彌密好焉彌敦而遠
焉者懷仁焉者同直令本朝儀禮耦于李唐仁真配於蒼姬麗
一時而傳千祀也係乎此一舉不亦利乎鄙言不知忌在傾愚
衷冒瀆之罪賜恕宥禮曹據此啓前次道安管提使送人及他
倭人等來京貿易時綿紬一匹價鐵則准四斤銅鐵蘇木則
十一斤已有定價不可移易且買賣從兩家情願不可使抑賣
請將此論道幸依前貿易 從之○司憲府據全羅道叡差官啓
本啓前順天府使鄭有容托以進上叡軍夫二百五十餘名獵
獸以朴仁後期乃杖之至死刼制仁子長明使不得叡告又叡

民丁採海菜鱖魚謂所得數少徵監考主吏綿布五匹餘則各徵一匹至於衣服什物盡行徵納且犯罪者一切徵贖計綿布一百二十匹布十九匹私與所識有容身任字牧浚民膏血無所畏忌雖經赦宥不可全釋請收告身錄賊吏案不叙徵埋葬銀給付仁家濫收物件並還本主 從之 命勿錄賊案○癸卯遣工曹判書成奉祖中樞院事奇虔奉謝恩表箋如大明謝絲段表曰天心字小曲加撫綏海甸霑恩深切感佩驚惶罔措糜粉難忘伏念猥將謏材端逢盛際叨襲敝服愧未補於絲毫特荷聖慈濫承榮於筐篚洪私若此前昔所稀茲蓋推一視而同仁利萬物而竝育遂令遐裔獲遇寵光謹當恪守青丘庶效登東之職願望紫宸恒輸拱北之誠方物表曰天貺聿臻采璫感佩土宜雖薄祗表謝忱謹備黃細苧布貳拾匹白細苧布貳拾匹黑細麻布陸拾匹黃花席貳拾張滿花席一拾伍張雜采花席壹拾伍張右伴物等製造匪精名般甚夥冀諒由中之懇優容享上之儀皇太后禮物紅細苧布貳拾匹白細苧布貳拾

匹黑細麻布二十匹中宮禮物同皇太子箋曰位尊儲二奉揚
聖謀仁篤懷綏贊宣睿澤佩銘曷已糜粉難酬伏念幸際昌辰
邈居遐裔祗勤候度愧乏絲毫之裨曲荷天恩濫蒙綵幣之錫
揆分逾望舉國知榮茲蓋孝益敦於順承心常切於翼亮遂令
庸質獲被洪私謹當載賡重潤之歌恭上千齡之祝禮物白細
苧布二十匹黑細麻布三十匹滿花席一十張雜彩花席一十
張謝錦幣表曰一人御極克篤懷綏萬里承恩祗增感激失心
圖報銘骨難忘伏念猥將弱質幸逢熙運顧乏絲毫之裨補何
期雨露之霑濡星使鼎來欣奉綸音之密勿天施渙降尤荷宮
錦之氤氳矧及寡妻亦蒙異數隆眷若此前昔所稀茲蓋推並
育之仁擴蕪容之量遂令駑鈍獲被寵光謹當恪守其封益謹
蕃宣之寄聊申華祝倍殫頌禱之誠方物表曰天貺沓至特荷
殊榮土宜雖微聊表卑懇謹備白細苧布五十匹黑細麻布一
百五十匹黃花席二十張滿花席二十張滿花方席二十張雜彩
花席二十張人參二百觔雜色馬二十四匹右件物等名般不腆製造

匪精豈充及物之儀庸修執壤之禮皇太后禮物紅細苧布二十匹白細苧布二十匹黑細麻布二十匹滿花席一十張雜彩花席一十張中宮禮物同皇太子箋曰尊居儲位望協輿情密贊皇猷恩霑海徼撫循自省感愧交并伏念猥以庸資幸逢昭代曾之勤勞之效特蒙錫予之私溫詔誕頒欣逢絲綸之命睿澤旁洽獲紆筐篚之榮舉國騰懽紛身難報茲益姿凝岐嶷德著元良諒小邦事大之誠體聖上綏遠之意遂令微品得荷寵光謹當永作藩於鯤峯恒申祝於鶴禁禮物白細苧布二十匹黑細麻布二十匹滿花席一十張雜彩花席一十張人參五十觔雜色馬肆匹○命都承旨韓明澮知中樞院事金何詣大平館請陳鑑等鑑等至 上出勤政殿門外迎入思政殿設宴酒行七爵而罷送于勤政門外○命注書梁順石賫魚肉海菜等物分賜頭目○命都承旨韓明澮賫白苧布四十匹黑麻布四十四匹分贈陳鑑等鑑等曰 殿下厚恩難以形容高閏傾行橐進上欲多受答賜既得答賜嫌其少慍見於色都監以聞乃厚遺細布

閔悅稱謝不已○甲辰義禁府啓禹繼蕃初會于戶曹依慕與同僚正郎安寬厚佐郎權得經權綸兵曹佐郎金兼光戶曹正郎南軼韓山郡事河吉之內贍少尹辛肅漢城少尹金孝給招妓飲酒請并鞫問從之○乙巳陳鑑求燈檠盥盆鐔溺器等物曰予家本單貧故求耳高閔求髮髻與閔誅求無厭凡備用之物莫不畢討閔驕傲簡慢外亢內墨高於鑑一等密從都監官索髮髻曰勿令正使知也○吏曹啓甲戌年十月受教內諸司吏典年四十歲以上仕滿者從願授散官職去官乙亥年七月傳旨諸司吏典年四十歲以上仕滿者從願授散官職去官丙子年五月傳旨內諸司吏典年四十歲以上仕日過半者年五十歲以上者不計仕日多少從願授散官職去官以故吏典輦冒稱其時有故未受至今狀告去官者多請依正統元年受教以不緊事故追申狀告者並勿受理獨其時遭父母喪者分揀去官從之○貞石正隆生母卒賜賻米豆并二十石紙七十卷棺槨○丙午震慶尚道軍威縣人朴季順家

降香祝行解怪祭○命左承旨曹錫文以別宣慰賚魚肉往開
城府○陳鑑病遣都承旨韓明澮問安○戶曹啓今奉 傳旨
叅詳黃海平安兩道居民農力不裕不得墾田今將陳地耕墾
條件謹錄于後一兩道諸牧場兒馬及病馬分授諸邑買牛量
其陳地多少或三四首或五六首差等分授一民有欲以官牛
耕墾者聽初年花利一半給佃戶一半官收補公廩及義倉所
墾之田先給佃戶他無田者并隨宜折給一新墾田限二年勿
收稅一監司每歲季具新墾田結負之數諸人折給之數公廩
義倉補添之數以聞一諸邑守令有能勸課致墾田多者褒賞
如或不量民力侵督耕墾者治罪一農牛料初年用諸邑軍資
陳豆其後用新田所出軍資陳豆亦以新田所出充償○丁未
彗星見○駕幸慕華館設餞宴贈兩使刀子倭扇鷹鞞○命都
承旨韓明澮賚角弓二張環刀二把徃碧蹄驛分贈兩使仍饋
肉酒遣左副承旨韓繼美于義州 命以貂裘二毛冠耳掩各
二油氈四部蓑衣二寢席四張黑斜皮鞋二事分贈鑑等又贈

頭目麻布各一匹○戊申領議政鄭麟趾禮曹判書洪允成都
承旨韓明澮自碧蹄來復 命○命當直都鎮撫權恭尹子雲
朴董揚汀沈安義李興商金漑會于承政院 賜宴樂時申叔
舟權擊李克堪金守溫徐居正徐岡李芮梁誠之李坡姜希孟
以製明使贈送詩在闕特 命赴宴又 命桂陽君璿鈴川君
尹師路侑之○己酉彗星見○御思政殿受常參視事 命留
領議政鄭麟趾參判具致寬承旨韓明澮議事○日本國肥前
州太守源義對馬州宗貞國各遣使來獻土物○刑曹啓近仗
李乙忠百姓文介叱知船軍金貴生李仁吉私奴他乃等路遇
田稅差使負韓山郡事柳克敬劫打至使帶鈎脫落衣紐絕斷
乙忠等以賤人不敢邦憲歐辱守令雖經赦宥不可不懲請全
家徙平安道博川以北 命全家屬江原道殘驛○庚戌彗星見
○長興庫紙耗二千一百餘卷 命司憲府劾其官吏○兵曹
啓崔末搭嘗於國喪奸妓千金月中蛾引置寡母家又於父喪
奸醫女月非坐不忠不孝戮配今以忠贊滿宿衛不可請除錄

從之○辛亥彗星見○壬子彗星見○上聞慶尚道觀察使曹孝門患手腫 命內醫平順馳驛往救○命桂陽君增傳于承政院曰大藏經五十件印出紙四十萬六千二百卷分諭諸道用漢麻雜以楮皮造進○初咸吉道甲山安定雲寵兩堡居人等上言安定雲寵本是內地故人民布散而居比者設堡令各入保當農月或二十里或十餘里之地往來耕耘農事不實且無冬夏人畜保聚漸至彫瘵乞依五鎮內地例兩堡人民任便散居 命兵曹議之兵曹啓令當道觀察使審度以聞至是據觀察使啓本啓安定雲寵既是內地其人民請令布散居住從之○癸丑日暈○百姓金正水言於前藝文提學尹士昫曰判敦寧府事宋珖壽行敦寧府判官權完謀逆士昫以啓上御思政殿 召見領議政鄭麟趾右議政鄭昌孫右贊成申叔舟右叅贊朴仲孫兵曹判書洪達孫禮曹判書洪允成領中樞院事尹師路判中樞院事李仁孫工曹判書楊汀吏曹判書權擘兵曹參判具致寬刑曹參判黃孝源都承旨韓明澮左承

旨曹錫文右副承旨權摯同副承旨金碩下玆壽完于兼禁府
仍下教旨曰前日成三問等言上王與其謀宗親百官合辭以
為上王得罪宗社不宜安居京師累月請之不已予固不允
欲保初心到今人心未定繼踵煽亂之徒不息予豈得以私恩
曲大法不顧上天之命宗社之重茲特從羣議降封為魯山
君俾出居寧越厚奉衣食以保終始以定國心惟爾議政府曉
諭中外命僉知中樞院事魚得海帥軍士五十護送軍資監
正金自行判內侍府事洪得敬從行○傳旨尚衣院曰祀天祭
玉幣五部以工曹雕造○甲寅三星見○魯山君薨向寧越
上命宦官安璐餞于華陽亭魯山謂璐曰成三問之謀吾知之
而不啓是吾罪也○拿致宋玆壽權完辭連婢冬白德恭于承
政院訊之皆服司諫院啓曰臣等曾將宋玆壽權完金師禹等
事請之今完玆壽事覺師禹不宜掌兵在外請速罷職○賀登
極使姜孟卿副使元孝然回自大明命遣都承旨韓明澮賚
宣醞迎慰于洪濟院孟卿等復命上御思政殿引見置酒勞

之永膺大君琰義昌君玗桂陽君增密城君琛雲城府院君朴
從愚當直都鎮撫及都承旨等侍○承政院奉旨馳書于敬差
官趙季砵曰今送魯山君油籠一囊衣二氈衫二及侍婢油籠
十事可一一傳付且令諸邑連續進冰○諭江原道觀察使金
光粹曰卿聽趙季砵金自行之言并審教旨曲盡布置○乙卯
遣內侍府右承直金精問安于魯山君○諭江原道觀察使金
光粹曰魯山君處四節果實隨所得連進為設園圃如西瓜甜
瓜至於蔬菜之類多備支供且每月差守令問起居其支供物
數起居節次月季錄啓○丙辰彗星見○司憲府啓前副司正趙
智威聽少尹柳孝班請與妾婢者今共謀誘置前郡事徐嬖女
子英今使孝班強奸孝班以識理朝士誘置英今擁逼強奸請
並收告身禁身推鞠從之○傳旨吏曹給琴以詠僧覺頓等
告身○丁巳太白晝見夜慧星見○御思政殿 命召宗親及
宰樞承旨等侍食 命楊汀進酒 上曰卿平日善用劔即賜
劔仍出內藏角弓 賜入侍宰樞各一張○吏曹啓德寧府復

稱仁壽府請革加設兼少尹一員 從之○戊午 御思政殿

受常參視事承旨金礪啓曰臣母在抱川久曠定省今在小功

之服乞往覲 上命給駟且 諭京畿觀察使備給酒饌○議

政府啓顯德王后權氏母阿只及弟自慎謀反伏誅其父專已

追廢為庶人且魯山君得罪 宗社已降封君其母不宜尚保

名位請追廢為庶人改葬 從之○諭慶尚道觀察使李克培

曰大藏經五十件始自來春二月摹印于海印寺須及六月前

畢功今遣敬差官尹贊鄭垠布冒卿其用意施行○諭忠清全

羅慶尚江原黃海道觀察使曰大藏經五十件印出所入忠清

道紙五萬一千一百二十六卷墨八百七十五丁黃蠟六十觔

全羅道紙九萬九千四卷墨一千七百五十丁黃蠟一百二十

五觔慶尚道紙九萬九千四卷墨一千七百五十丁黃蠟七十

觔胡麻油一百 對江原道紙四萬五千一百二十六卷墨八百

七十五丁黃蠟一百二十五觔黃海道紙五萬一千一百二十

六卷墨八百七十五丁黃蠟六十觔皆官自準備送于海印寺

若收民楮雖一兩鄉等當受大罪○禮曹判書洪允成母卒
賜賻米豆并三十石紙一百卷石灰四十石松脂三斗油菘三
部槨棺賻卒藝文大提學尹炯母亦如之○司憲府啓禮葬都
監判官申自衡踈薄正妻昵愛妓楚腰輕惟其言是聽至杖殺
家婢二人本府據隣保所告劾問自衡乃言事出不根聽人陰
嗾而訴又言蓄妓妾者為人所憎以此修飾拒不引服事關綱
常理須究竟請收自衡告身追身推鞫從之○己未慶尚道
安東官奴李同因判中樞院事李澄石詣闕言瑜在順興潛結
羣少謀為不軌且進瑜所施紬帶為驗上引見于思政殿
命杜陽君璲都承旨韓明澮按問遂命遣少尹尹慈于順興右
輔德金之慶于醴泉鎮撫權城于安東鞫瑜辭連人又命宦
官池德壽安忠彥往順興牽瑜及妻子以來遣內醫李有黃賫
藥護視又諭所經諸邑具酒饌饋之○庚申判書雲觀事梁誠
之進龍飛御天圖其序文曰小臣常侍書筵東宮邸下出龍飛
御天歌使臣等定口訣以備觀覽臣竊惟帝王基業積之百年

而不足毀之一日而有餘故詩云無念爾祖聿修厥德書曰無
毀我高祖寡命今此歌所以叙 祖宗積累之艱難以為子孫
持守之規誠後聖之所當龜鑑也然引古證今及復歌詠編次
浩穰固難以撮其要而提其綱也臣為是慮潛心考之詩凡三
百二十五章今以七條為大綱而分屬之中上行曰先世積累
之久屬一十一章中心曰開國屬二章中下行曰後聖持守之
難屬一十六章左一行曰盛德屬三十四章三行曰大功屬三
十四章右一行曰天命屬二十六章二行曰民心屬二章仍標
識歷代註題事類以獻伏惟聖慈垂覽因 賜東宮置之左
右朝夕觀省使知我朝鮮開國之慶實由 祖宗積累之久也
有盛德而建大功也受天命而得民心也以至子孫萬世日慎
一日敬天勤民無敢或忽則臣所謂後聖持守之道豈有加於
此哉 上曰此圖至為精詳 命送于東宮○傳旨吏曹曰堂
上守令以三十月為限○諭順興府使曰聽池德壽安忠彥之
言瑜處宣醞及節物菜果隨宜備給又諭慶尚全羅道觀察使曰

道內安置咸陽玠錦山璵任實瓊光州鄭棕等禁防虛踈守令
固有罪監司亦且不免更加防嚴○傳旨戶曹曰以璵籍沒延
安家 賜右叅贊朴仲孫○辛酉吏曹啓慶尚全羅兩道土地
之廣人物之繁倍於他道而於大邑不設土官誠為闕典如慶
州全州本是御鄉須設東西班五品以下土官其階品官職及
合行事件條列于後一東班土官正五品通議郎從五品奉議
郎正六品宣職郎從六品奉職郎正七品熙功郎從七品注功
郎正八品供務郎從八品直務郎正九品啓仕郎從九品試仕
郎一西班土官正五品建忠隊尉從五品勵忠隊尉正六品建
信隊尉從六品勵信隊尉正七品敦義徒尉從七品守義徒尉
正八品奮勇徒尉從八品効勇徒尉正九品展力徒尉從九品
効力徒尉一慶州土官東班都府司使一正五品副使一從五
品丞一正六品典禮司使一從五品注簿一正七品丞一正八
品典賓署令一從五品注簿一從七品直長一從八品錄事二
從九品軍器署令一從五品注簿一從七品錄事一從九品營

繕署令一從五品注簿一從七品錄事一正九品司農署令一
從六品注簿一從七品錄事一從九品司倉署令一從六品注
簿一從七品錄事一從九品諸學院丞一從六品直長一從
八品錄事一從九品安仁部東令一從六品錄事一從九品義
順部西令一從六品錄事一從九品興禮部南令一從六品錄
事一從九品知明部北令一從六品錄事一從九品典醞署令
一從七品錄事一從九品司獄署令一從八品錄事一從九品
西班牙鎮海衛一領司直一正五品副司直一正六品司正二正
七品副司正二正八品司勇二正九品隊長二十七隊副四十
從九品二領司直一從五品副司直一從六品司正二從七品
副司正二從八品司勇二從九品隊長二十七隊副四十從九
品三領司直一從五品副司直一從六品司正二從七品副司
正二從八品司勇二從九品隊長二十七隊副四十從九品四
領司直一從五品副司直一從六品司正二從七品副司正二
從八品司勇二從九品隊長二十七隊副四十從九品一全州

土官東班都府司使一正五品副使一從五品丞一正六品典
禮司使一從五品注簿一正七品丞一正八品典賓署令一從
五品注簿一從七品直長一從八品錄事二從九品軍器署令
一從五品注簿一從七品錄事一從九品營繕署令一從五品
注簿一從七品錄事一正九品司農署令一從六品注簿一從
七品錄事二從九品司倉署令一從六品注簿一從七品錄事
一從九品諸學院丞一從六品直長一從八品興元部東令一
從六品錄事一從九品基化部南令一從六品錄事一從九品
永康部北令一從六品錄事一從九品隆江部西令一從六品
錄事一從九品典醞署令一從七品直長一從八品錄事一從
九品司獄署令一從八品錄事一從九品西班鎮南衛一領司
直一正五品副司直一正六品司正二正七品副司正二正八
品司勇二正九品隊長二十二隊副三十七從九品二領司直
一從五品副司直一從六品司正二從七品副司正二從八品
司勇二從九品隊長二十二隊副三十七從九品三領司直一

從五品副司直一從六品司正二從七品副司正二從八品司
勇二從九品隊長二十二隊副三十七從九品一今土官
新設之初各品窠闕難以一一差補若無職秩相當人則不必
填差須要次次遷轉若資級與職事不相當而不得已用之則
行守職差下其守職則依京官例從九品不得陞為正八品從
八品不得陞為正七品餘品准是以防猥濫之弊一土官東西
班祿令戶曹依平安咸吉道士官例磨勘施行從之○秋七
月壬戌朔啓川尉李登率登尚太祖女義寧翁主性勤謹不怠
雖隆寒盛暑未嘗廢朝謁晚年尤謹人或止之曰吾以不才濫
緣戚里得至於此坐費廩祿未有少補何憚朝謁至是年年七
十九官庀葬事謚胡安彌年壽考胡好和不爭安有子四人二
子渲中壬子科位至樞密○日本國對馬島主宗誠職遣使來
獻土物○尹陪者大護軍統之子也嘗居永川來告承政院曰邑
人前德源郡事曹尚明等二十五人得皇甫仁朱書其書曰金
政丞得慶州則皆用汝等矣尚明秘藏之其婢夫李同者搜得

以示臣臣欲賈來本邑品官人吏追捕奪去且囚臣使不得出
入承政院見其言貌誑誕頭戴葦笠膝短布衣疑為狂人詰之
陪自言曰吾買此言時得此葦笠與綿布帶承政院以啓命
召其第訓鍊參軍尹末問之末曰兄陪自少有疾養於祖母家
祖母歿後隨父居鄉常發狂疾父不能制鄉人亦不齒命末
率去○癸亥御慶會樓下設宴宗親二品以上議政府六曹
叅判以上延昌尉安孟聃河城尉鄭顯祖判中樞院事李澄石
雞林君李興商漢城府尹李純之洪元用藝文提學金末京畿
觀察使李承孫宣傳官部將鎮撫司僕官等入侍分左右或射
侯或投壺世子及宗宰以次進酒命擊鍾聚闕內軍士於慶會
樓池邊賜酒○甲子順興府使李甫欽馳啓瑜謀逆上命
大司憲金淳判禮賓寺事金修往鞫之上追念瑜不已將修
京家備什器藏獲欲召還瑜性強狠輕率潛通府吏重才謀因
甫欽禮謁贈以珍寶衣物劫甫欽以反○乙亥御思政殿月
廊擊新鍾聚闕內軍士賜酒○吏曹據諸司吏典金守潭

等上言啓近來加設諸司吏而不加去官適兒因此沉滯者多
其加二十人者每年給檢職適兒二加十人者給一加五人者
隔一年給一從自願各於去官本品加一資除授去官 從之
○戶曹啓諸道諸邑義倉米穀數少每當救荒之時用軍資米
竊稽隋長孫平奏請每當收穫之日取民上戶一石中戶七斗
下戶四斗以立義倉宋朱熹請借常平米取息以立社倉原
其本意皆欲豫蓄以救民急請自今以軍資米穀賑貸其還收
之時每十斗取息四斗歲抄具數以聞 從之○兵曹啓銃筒
衛今已革罷其中欲屬甲士別侍衛者從情願取才入屬通計
前仕叙用欲屬防牌攝六十與司僕司饗忠扈衛諸真及外方
諸色軍士者亦各從願施行 從之○丙寅潭陽彌羅寺僧惠
明以邑人數十相聚謀亂疏其名上之 命兵曹參判具致寬
大司成安知歸往鞫之○傳旨吏兵曹曰設官所以代天理物
官冗不可不汰昔唐太宗有天下首革冗負我國冗官實多磨
勘沙汰○傳于戶曹曰百官祿俸今秋孟月為始自正一品至

從五品各峯一科○吏曹啓近來宗親累蒙 恩命例授五六

品者階至彰善隨其資級給祿非徒有違詳定之意祿科亦為

猥濫請依正統八年 教旨詳定職秩稱行改正但其正從區

別為難正三品稱正從三品稱副正正四品稱令從四品稱副

令正五品稱監從五品稱副監正六品稱長 從之吏曹又啓

今奉 傳旨可汰冗官冗員磨勘後錄一敦寧府無職事中樞

院亦無所管而負額過多敦寧府堂上郎官並皆革罷中樞院

堂上元額三十四內革判院事院使知院事各一同知院事副

使各二藝文館雖掌文翰大提學提學別無職事革大提學為

兼官一內侍府掖庭署官職最緊內侍府曰知府事同僉府事

左承直右承直左副承直右副承直各減一司謁減三謁者官

闈丞奚官令各減二掖庭署司謁司鑰各一新設副司鑰一慶昌

順府司鑰等 供奉三府二掖庭署別監遠兒一慶昌新設謁者二

和會遠兒 順府司鑰等 供奉三府二掖庭署別監遠兒一慶昌新設謁者二

一司謁等和會行職遠兒一掖庭署別監遠兒一慶昌新設謁者二

色及慶昌府仁順府司鑰等和會遠兒 左班殿直三署別監

遠兒一慶昌府仁順府司鑰等和會遠兒 左班殿直三署別監

府別監等和會遠兒 內班從事三昌府仁順府別監和會遠兒其

遠兒一慶昌府仁順府司鑰等和會遠兒 內班從事三昌府仁順府別監和會遠兒其

遠兒一慶昌府仁順府司鑰等和會遠兒 內班從事三昌府仁順府別監和會遠兒其

餘掖庭署司謁司鑰各二慶昌府左右司鑰仁順府司鑰二掖
庭署內謁者謁者各一副謁者仁順府司謁者各二掖庭署供
奉三左班殿直四慶昌府右班殿直一掖庭署內班從事五慶
昌府內班從事並皆革罷一諸道觀察使節制使處置使經歷
都事皆以京官兼差一官制既省窠闕窄狹然有功勞者不可
遺棄失祿依古制立奉朝請之法親功臣內應奉朝請者正一
品准正三品五科從一品准正三品同五科正二品准從三品
六科從二品准正四品七科正三品堂上官准從四品八科功
臣嫡長內應奉朝請者正一品准從四品八科從一品准正五
品九科正二品准從五品十科從二品准正六品十一科正三
品堂上官准從六品十一科東西班堂上官內應奉朝請者正
一品准從四品八科從一品准正五品九科正二品准正七品
十三科從二品准從七品十四科正三品堂上官准正八品十
五科行上護軍准從八品十六科行大護軍准正九品十七科
行護軍准從九品十八科一宗親大君以下從五品以上駙馬

及東西班一品以下從五品以上及一應雜職從五品以上並
限豐年各適降一科給祿如第一科降受第二科之數諸道觀
察使節制使處置使經歷都事於實職例降一科依在前比京
官降一科例又降一科奉朝請堂上官既已降科各從本科給
祿大君雖降一科加給之祿仍舊從之○以申叔舟為議政
府左贊成黃守身右贊成朴仲孫左叅贊成奉祖右叅贊朴元
亨刑曹判書黃致身沈滄李昇平中樞院使盧叔全藝文提學
兼江原道觀察使辛碩祖吏曹叅判兼京畿觀察使金連枝戶
曹叅判宋處寬禮曹叅判安崇孝工曹叅判兼全羅道觀察使
金光晬朴居謙中樞院副使郭連城慶昌府尹柳洙仁順府尹
韓昌兪知中樞院事兼忠清道觀察使李克培工曹叅議兼慶
尚道觀察使李禮孫兪知中樞院事兼黃海道觀察使咸禹治
咸吉道觀察使元孝然平安道觀察使李澄石梁山君奉朝請
延慶谷山君奉朝請南景祐宜山君奉朝請○諭江原道觀察
使曰魯山君日用供費隨其所欲曲盡支給如有欲啓事許令

告本邑母使阻滯又聞所居無井急令鑿之○承政院奉旨馳
書于大司憲金淳曰順興吏重才聽瑜言密送其子于鄭有才
家使之潛通必有情由且李甫欽身瑜之時重才亦然雖與甫
欽上變其情異於甫欽可禁身鞫之○吏曹啓謹稽舊制宗親
之謹良者特許加階今進禮正衡居平正復能通經書已令放
學而例授從四品職有違褒賞之典請陞授正四品以開宗彝
勵學之門 從之○丁卯 御思政殿受常參視事輪對臨瀛
大君璆永膺大君琰義昌君五桂陽君璿密城君琛寧海君瑋
領議政府事鄭麟趾延昌尉安孟聃鈴川府院君尹師啓河城
尉鄆顯祖禮曹判書李承孫中樞院使沈澮兵曹判書洪達孫
工曹判書楊汀承旨等侍食 上賜麟趾酒顧謂諸宰樞曰
太祖待韓山君甚尊敬我今日待領議政亦如是也 命承
孫進酒次明澮次麟趾 上出王羲之趙孟頫書帖示之因議
書法麟趾曰本朝人書法皆俗殊不如古 上曰廣布法帖則
當有善書者遂賜麟趾織生絲團領○命遣醫員曹敬智于寧

越送魯山君衣物○戊辰持平金琦將本府議啓曰洪逸童受命赴朝而中路擅還赴試既赴試不啓而還及中試上命召亦不赴召不敬莫大且老母在堂初不辭遠行忠孝俱虧不宜任用請罷去以勵士風傳曰豈以此小失而不叙乎琦復啓曰逸童非童幼無知而所行如是用之何為傳曰所犯無情特小失耳其勿復言○己巳御思政殿受常參視事世子及桂陽君璫義昌君玗翼峴君璉右議政姜孟卿領中樞院事尹師路延昌尉安孟聃工曹判書楊汀花川尉權恭承旨衛將部將宣傳官等侍食命孟卿進酒上賜於頊于諸宰曰此承政院所進也謂頊曰此頊貫汝所辦汝可進酒孟卿曰本院饌具皆同副承旨掌之上曰卿等知飯監陳壽之為人乎孟卿對曰知之上曰嘗聞壽為政院飯監將院吏所備之饌若為自備者而饋承旨曰草草不敢供此諂人也孟卿曰壽之為人勤於執饌臣以為此可取也上笑曰注書史官不能記陳壽之事焉能記予之事孟卿曰臣嘗為注書只掌書日記誌

職帶春秋未能別記時事 上曰自今注書職兼春秋令悉記
之又曰人君享一國之奉安居深宮不知畎畝艱難民生疾苦
非人君之道自今當巡境內以省民事 命孟卿及承旨守議
巡狩節目即 傳于兵曹曰今秋收後巡狩忠清慶尚道其辦
諸事○庚午成均生貞吳庇民等上書曰臣等竊聞自古聖帝
明王建學立師以養人材以培國脉惟我國家自 太祖開創
以來首建國學擇明經宿德之士以典師表之任而嘉義顯寵
悠久不易者必使學者優游觀感薰陶涵泳以盡成德之功此
正易傳所謂久於其道而化成者也今藝文提學金末自少肆
力於學蒐羅經史志節清介操行無疵自擢第以後為學官凡
三十餘年孜孜訓誦封植人材當世名卿鉅儒與夫宗子宗孫
彌為好學者無非末訓迪作成之儻不至昏耄則固宜委任責
成而乃今七月初五日以末除大護軍奉朝請而罷成均之任
臣等竊有憾焉夫學校乃首善之地而幸高德邵之人亦不易
得 殿下所以解其重任者以為表朽無用歟抑為汰其剩負

歟以為衰朽也則志氣尚強言動中度諄諄善誘不憚其勞以
為剝負也則國家重事孰有大於化民成俗者乎昔唐陽城以
國子司業出為道州刺史大學生上書留之者至再至三今未
非有陽城方面之任而解任處閑則臣等之失望豈特如唐之
大學生之心而已哉伏望 殿下垂日月之明廓乾坤之度特
還其任以副臣等狂僭之望 御書答曰求諸自性自有餘師
國家用人非儒生所容○日本國王使臣及大內殿使送人宣
慰使左弼善柳子滉辭數向薺浦○司諫院啓曰近年水旱不
齊禾稼不登忠清慶尚道饑饉尤甚請停巡狩 傳曰巡狩乃
觀民疾苦之舉巡狩則不無興利革弊之事矣○諭大司憲金
淳曰瑜除枷鎖拷訊與李甫欽及辭連人憑問閱實若不輸情
當宣傳云不輸情則令義禁府拿致推鞫○辛未 諭大司憲
金淳曰瑜之迷妄在悖非今所知豈可以人理待之付之一笑
而已無足介意也然骨肉至親不於此時展吾真情則無以報
父母在天之靈矣且罪非瑑比然不可不究竟事狀卿宜宣傳

於瑜曰爾罪重大死有餘辜何必取招然後知其罪也所以問汝者効辭連人耳汝作事至此猶不知予恩德暫不吐實汝料隱諱幾日乎予祇不能明正大典以靖一國而自初排羣臣之議曲庇無遺將欲與汝同享大平之樂今又曲降恩澤保汝及妻子若不吐實與國家至正至大之論如是而已乎汝其免扭械枷鎖刑問壓膝之苦乎無亦恨無所及歟汝其商量之又和顏善辭以諭之又不得已則項鎖囚之翼日如前再說此外勿為過當解鎖移置安東云將往安東更勸以路次故解鎖送之汝其熟圖○世宗宮人曹淑儀父死賜賻米豆并二十石紙一百卷棺槨○壬申御思政殿臨瀛大君璆永膺大君琰桂陽君增翼峴君璉義昌君珪密城君琛判中樞院事李仁孫左贊成申叔舟判漢城府事金世敏吏曹判書權擘兵曹判書洪達孫工曹判書楊汀忠清道觀察使盧叔全當直都鎮撫承旨等侍食上携明滄手入康寧殿仍召叔舟擘達孫汀及宗親等行酒賜明滄等各水鐵鑼鍋三部鹿皮一張角弓一張○司憲府

啓曰今值旱乾禾穀不遂秋成之望已絕不宜巡狩傳曰大事已定不可止也○傳旨司憲府司諫院曰予即位以後言官有不得盡言之勢一則以予備嘗艱厄民之疾苦雖言之不介意一則以予好佛言之必怒一則小事言之必拒却曰瑣瑣一則以予有嚴威言之恐得罪以此進退商量議論合否不能展職予知其弊久矣但予方經綸未暇小節耳敢不念祖宗故事言官自未悉大體所致也宜體國家大義知無不言專以體君安民為慮以致隆平○癸酉持平金琦左正言吳凝等將本司議啓昨日下午旨開言路臣等不勝感激今年旱民未播種其或播種則亦焦槁况富山浦薺浦倭人所聚巡幸從衛簡則無以示威多則慮致恐動且不可虛內經時遠行請停巡狩傳曰下旨非為言巡狩事也倭人汝等畏之乎我不畏也凝更啓曰巡狩臣等未知其意車駕約其從衛如倭虜視瞻何傳曰兵革之事非儒者所與巡狩之意非汝等所能知必有深意勿復言○兵曹啓今奉傳旨沙汰冗員上林園管事減五副管事減三典事

減九副典事減十給事減二十九副給事減三十四從之甲
戊司憲掌令權衝等上疏曰近以巡狩事累瀆天聰未蒙俞允反
復思之不能自己臣等竊謂巡狩之禮自唐吳三代而然然不過
會羣后於方岳明其黜陟而已漢唐以降繁簡異宜此禮遂廢時
君世主豈不欲復古昔先王之盛禮而猶不敢行者得非古今
時異事殊而勢有不可行者乎夫人主議大禮舉曠典必稽古
之制酌時之宜謀及卿士至于國人皆曰可然後行之故動無
過舉而至治可興書曰慮善以動動惟厥時是也臣等庸妄昧
於事體未知殿下巡狩之舉合於古宜於今乎問諸臣僚國
人則未知曰可乎不可乎時和歲豐蓄積有餘猶且不可為况
近年旱澇相仍公私俱罄今雖省弊大駕所過豈無營辦供億之
費吏民奔集之弊又豈可慮其弊而簡其車徒不嚴行宮之體
貌乎古之明王高拱九重之上威化遠被故遊方殊俗梯山航
海稽顙闕下瞻望天光畏威懷德之不暇今三浦倭奴雜處之
地而大駕一朝猝臨則彼其非我族類安知殿下巡狩之盛

禮恤民除弊之至仁乎恐相驚且謂至尊何為遠巡瘴海乎或有從此而測其淺深者此則其傷大體也實為不小儻曰殿
下此舉出於國家不得已之事則臣惑滋甚伏望 命停巡狩以
副臣民之望○吏曹啓吏科及承蔭出身封贈爵牒等項文牒皆
用吏文獨於東西班五品以下告身襲用吏讀甚為鄙俚請自今
用吏文 從之○乙亥司諫院左司諫金從舜等上疏曰臣等
近將巡狩不便事宜仰瀆天聽未蒙俞允復為書以聞臣等竊
謂我國家近年以來饑饉相仍去年旱旱晚水禾稼不登南方
尤甚民失生業流離餓殍能繼饘粥者百無一二拾草實剝松
皮以延朝夕之命雖遣使賑恤官無蓄積未能周急今年自春
徂夏連月不雨民無麥食趁時播種者亦寡近日雖有小雨如
沃焦釜無復有西成之望臣等竊恐來歲凶歉有甚於今年也
是宜停冗務省浮費靜以鎮之專務賑恤猶恐不贍乃於此時
有此大舉雖曰略車徒省供費弊不及民然大駕所至士卒糈
糧之費州郡奔走之弊館宇道路之修輜重爲粟之轉其餘弊

端豈可一二盡除乎萬一有執事之臣不體上意絲毫分寸擾
及於民則非 殿下恤民祛弊之盛心也臣等又謂舉動人君
之大節不可不慎也今若離 宗廟社稷之所在移旬易月巡
幸邊徼道路銜檠之虞亦不可不慮此臣等所深憂反復連達
而不能自己也願 殿下試加三思不以臣等齟迕廢其言也
不允○禮曹啓今雨澤愆期請於北郊及祀典所載通行祈禱
並於京畿下三道降香祝禱雨 從之○傳旨禮曹曰忠清全
羅慶尚道失農尤甚姑令停進朔望物膳○琉球國王使者倭
僧道安等十五人來獻土物初濟州人韓金光金新石乙伊升
同陽城私奴卜山吾之得山卜世良女之內私婢陽莊等遭風
漂入琉球至是國王以金光金新石乙伊之內檢道安送還○
以旱甚徙市○丙子御勤政殿受朝賀御思政殿視事都承旨
韓明滄啓曰今年全羅慶尚道旱氣太甚今得具致寬書全羅
道禾穀盡焦所不忍見 上即召右議政姜孟卿判中樞院事
李仁孫左贊成申叔舟吏曹判書權學及承旨等議巡狩可否

諭慶尚道觀察使曰前日因旱播種失時分秧亦晚閏近日旱災尤甚禾未發穗予甚慮焉巡狩雖大事利益千萬而凶歉若此似不可輕舉鄉悉此意毋謂予志已定且拘於大事其審未毅之狀須以實啓○司憲府又請停巡狩傳曰予當思之○義禁府啓權元言上王復立則甚好但此事不易與宋珰壽交通謀逆完珰壽並律應凌遲處死籍沒財產緣坐並依律文施行命完依所啓珰壽更推鞫○司諫院啓曰宗簿少尹李文炯今趙四資一則依從功一則代弟繼潘職二則代妹夫瑞原君案職其為冒濫甚矣請改正傳曰爾言當矣○傳旨禮曹曰闕內供上及京外公處用酒一皆禁斷慈壽宮壽成宮寧壽宮則依前供進民間用酒勿禁○承政院奉旨馳書于江原道觀察使曰今因早一禁諸處用酒然於魯山君處依前供酒○義禁府啓禮曹正郎禹繼蕃道遇趙肅生妻誤認為妓碎髮歐傷罪應杖一百徒三年命以功臣之孫只收告身發配遠方遂配龍安○丁丑受常參視事命留右議政姜孟卿領中樞院事尹師路吏

曹判書權擊工曹判書楊汀兵曹判書洪達孫雲城尉朴從愚
花川君權恭知中樞院事金鈞朴薑青城尉沈安義吏曹參判
李克堪兵曹參議韓終孫兵曹知事權愷承旨等食侍 命從
愚進酒曰昔唐太宗如洛陽使房玄齡留守有人告玄齡及太
宗曰朕既信之復有何疑遂斬告者瑜雖以卿為援予以玄齡
待卿卿勿以為慮從愚強辯不已 上曰不信我命耶遂下從
愚于義禁府既而釋之擊新鍾聚入番軍士衛將部將等進退失
律 命權擊楊汀達孫率來衛將沈安義李埤權軀部將申興
禮等四人免胄跪庭下罰以酒○以金鈞知中樞院事金末陞
資憲兼成均司成注書梁順石河漢近兼春秋館記事官注書
兼春秋始於此○諭大司憲金淳曰大獄不可遙指同封書內
付辭連人及瑜使喚婢子等並令尹慈權城押送金修仍留待
命所使婢子以官婢量宜定給嚴加守護使不得逃逸自盡且
凡辭連人內已繫獄者某某等幾人已現未收捕者某某等幾
人加現行移收捕者某某等幾人明白具啓卿與李甫欽可速

上來○戊寅 御思政殿視事 王世子與永膺大君琰桂陽
君增義昌君玗翼峴君璉領中樞院事尹師啓雲城府院君朴
從愚花川君權恭左叅贊朴仲孫禮曹判書李承孫兵曹判書
洪達孫刑曹判書朴元亨工曹判書楊汀承旨等執義趙安孝
右司諫徐居正等侍食 命從愚行酒以慰之居正進曰古者
天子巡狩諸侯各朝于方岳則是朝諸侯有常處也今 大駕
南巡至于公海小邑莫不巡狩則雖欲省弊而弊將巨矣亦與
古制異矣 上曰近者下求言之旨欲開廣言路非必事事盡
從也諫官之言吾所當從者則從之將不當之論以諫則其可
盡從乎言官前日上書至再知我不從今又進諫非也然予聞
惟后從諫則聖予雖不允若等進諫之意則美矣倘後日謂予
不從而不諫則非也○宗簿寺啓宣城君茂生嬖倡妓屏妻於
外已為薄行又謂其妻擅自出歸指為難化強辨不承至甚不
當請 上裁命離異妻妓定京役罷茂生職○兵曹啓慶尚左
道進上及倭人輸貢之物皆經由忠清道長林黃澗水山連原

可興京畿安平新津揚花阿川留春吾川慶安奉安娛賓德豐
平丘等驛彫弊為甚宜革驛丞以右道水站判官兼差察訪或
用驛馬或用站船隨宜轉輸其餘諸道諸驛以吏典差任非惟
諂待使客來往之人亦以為秩卑侵擾作弊請罷丞置察訪
從之○戶曹據平安道觀察使啓本啓義州狄島金倉庫洞貴
林島軍大洞馬山平等處土田曾許傍近居民自耕自癸丑年
以後因野人事變禁耕然馬山平與造山平相接皆在狄江之
內賊不能猝至且其守護之所今移馬山請令本道觀察使先
給貧民具結負數移文本曹以憑後考 從之○司憲府啓申
自衡嬖妓楚腰輕令管家事疎外正妻請依律科罪 命只收
職牒妓配遠方憲府又啓柳孝班結趙智威及若今用詐謀招
致良女英今于私婢金德家逼而私之罪應處絞以功臣 命
減一等贖其杖○己卯兵曹啓七番甲士本九千四百五十人
今為十一番京甲士五千二百五十兩界甲士四千二百依舊
例更四朔番上遶兒則每一番京甲士司直四百六十九內七

番各四十三餘四悉各四十二副司直六百七十二內一番六十二餘十番各六十一司正一千九十九內十番各一百餘一番九十九副司正一千一百六內六番各一百一餘五番各一百司勇一千九百四內一番一百七十四餘十番各一百七十三兩界甲士每一番司直各一百四十內八番各十三餘三番各十二副司直各二百十七內八番各二十餘三番各十九司正各一百五十七內五番各三十三餘六番各三十二副司正各三百六十四內一番三十四餘十番各三十三司勇各一千二十二內十番各九十三餘一番九十二家前一年三都目護軍去官其餘京甲士司直六十七內四品適兒六兩界司直二十內四品適兒各二則今減司直適兒三分之一請並革從之○庚辰 御思政殿引見琉球國使者道安等十三人○辛巳 上御慶會樓東偏房 召承旨 守議救荒巡狩事 命韓明澮曹錫文往左贊成申叔舟第議巡狩可否明澮等將叔舟議啓曰不得已則簡扈從為便○御思政殿 命右議政

姜孟卿判中樞院事李仁孫左贊成申叔舟兵曹判書洪達孫
工曹判書楊汀都承旨韓明澮左承旨曹錫文議省巡幸諸事
仍命侍食○京畿水原任內龐城人金吾乙亡來告安城人
趙授趙復誠復平金允中黃季孫等亂言命義禁府知事慎

後甲率軍士十人拿季孫等以來○刑曹啓外方罪囚守令鞫
報觀察使觀察使更令照律更報待回報然後斷罪緣此獄訟
稽滯或觀察使巡歷遠處或執吏淹延彼此徃復動經旬月至
於輕罪久繫犴獄請自今死罪外一應雜犯守令畢鞫照律報
觀察使待決斷罪從之○壬午以權躔為戶曹判書沈澮工
曹判書楊汀知中樞院事慶尚左道都節制使洪允成起復知
中樞院事慶尚右道都節制使權愷兵書參議允成遭母喪在
鴻山御札諭允成曰予方有意於南道卿方展任之時遽遭
大故何其不幸中外阻脩時久存問久矣予慮卿喪祭之事或
未備已令公辦又命起復卿而除慶尚右道兵馬都節制使此
舉卿所知也國家大事非卿誰委卿體予心割制私情葬畢後

宜速赴召親受方略起居何若為國自愛時或因金革起復或以衰病許勸肉喪制浸不如古往往有因微病自許啗肉疾已亦不復初者○御思政殿特召兵曹判書洪達孫工曹判書楊汀都承旨韓明澮左承旨曹錫文議事 命明澮錫文往右議政姜孟卿左贊成申叔舟第議巡狩可否明澮將孟卿議啓曰今旱氣太甚禾稼焦槁縱欲省弊必有糜費思之日夜未獲其宜今承 上教欲停巡狩甚合臣意錫文將叔舟議啓曰巡狩固美事也且近者倭人自相構隙巡幸一舉可以懾服然今年旱曠慶尚尤甚臣意以此為難 上命停巡狩○遣通事金南管狎被虜逃來唐人曹三把奴等男婦三口解赴遼東○授琉球國王使者倭僧道安及倭信沙也文職護軍 賜銀帶各一腰○傳旨戶曹曰曾下令諸邑軍資米穀自今年取息然今年只依舊收納忠清全羅慶尚三道旱氣尤甚民生可慮凡徭役貢賦之可除者令其道觀察使磨勘以聞今取息軍資之穀依續戶典義倉例令納者自量如有不法者觀察使嚴加考察許

納者自訴用多收稅糧斛面律加一等科罪○癸未雨議政府
左叅贊朴仲孫禮曹判書李承孫以久旱得雨請進香醞上
御思政殿引見仲孫承孫及京畿觀察使辛碩祖當直都鎮撫
承旨等侍食上曰邇來旱甚念民艱食予以此却酒有日夜
來雨澤稍洽喜甚今與卿等一飲仍命仲孫承孫進酒數行
而罷上謂工曹判書沈澮曰予尊敬舅氏之心曷嘗少弛君
臣禮嚴未盡家人之禮澮頓首謝謂領中樞院事尹師路曰
予之用澮非以戚屬苟無材幹斷不任事澮曩因沉滯專心讀
書又其人品精明卿等第觀行事當自知之○賜琉球國使臣
倭僧道安宴于禮曹道安酒酣歌舞禮曹判書李承孫語之曰
上授汝護軍職汝知之乎道安扣頭拜謝曰不還本國願居於
此○甲申命禮曹判書李承孫宴倭信沙也文于其第承孫
語沙也文曰上授汝護軍職護軍大夫職也帶銀帶榮貴莫
甚沙也文扣頭曰祝殿下萬歲○諭八道觀察使曰久旱水
田不秀無知之民意謂秋節已過無復可望必不致意耘耨若

務去其草率得兩澤則猶可幾穗結實卿悉此意勸民變草以待西成○司憲府啓忠順衛申翊嬖婢妾踈棄正妻合杖九十上以翊功臣之子只 命收告身○乙酉慶尚道比安人李孟德告邑人卞仲老卞義孫卞倫周有顯等亂言 命義禁府拿致推鞫○賜判中樞院事奉朝請李澄石几杖○丙戌 御勤政門受朝參 御思政殿視事輪對改倭人信沙也文名金信文禮服入侍 傳曰汝信文慕義欲効力特賜爵命信文頓首謝仍 命兼司僕○丁亥大司憲金淳來復 命○咸吉道觀察使啓永興府百歲老人奉列大夫吉永富例給酒肉惠養○少子謝恩使右贊成黃守身同知中樞院事閔瑗等來復 命○世子未寧 召領議政鄭麟趾右議政姜孟卿左贊成申叔舟兵曹判書洪達孫知中樞院事楊汀及承旨議藥○己丑以世子病聚僧二十一人於慶會樓下設孔雀齋竟夜作法 命議政府堂上六曹判書以上及承旨入齋祈禱○雷震慶尚道仁同縣人李叔專家奴不至死令其邑守令委醫救藥降香

祝行解恠祭○庚寅義禁府啓瓔玦瓊鄭悰等妻妾若子已許
從願完聚其使喚婢子皆有定數比聞數外增率者或有之其
中雖有逃亡物故者亦無由得知請令所在守令將諸人妻妾
子女婢子乳母字名年齒具數錄籍并逃亡物故者轉報本府
府亦立簿以憑後考 從之○諭咸吉道都節制使鄭連城曰
野人倭人俱為我藩籬俱為我臣民王者等視無異或用為力
或用為聲不可以小弊拒却來附之心予即位以後南蠻北狄
來附者甚衆皆願為我子此天所誘也非予智力但來往驛路
有弊國家支待難繼以時宜授卿方略如左一著浪亭兒罕速
魯帖木兒李貴也等諸酋請朝則答曰有旨近日來朝不久今
年勿送如捕捉松鶻別例親啓事上送一黑龍江速平江兀狄
哈火刺温建州衛兀良哈李滿住童倉等深處野人及三衛撻
子扣關請朝則約其從人厚待上送一如野人無所加禮其餘
從人館待優厚○辛卯安城人蔣仁孫告李貴成宋繼殷等亂
言 命義禁府知事辛潤祖率軍士十人同仁孫往安城拿來

○傳旨戶曹曰下三道貢鹽勿買布以備明年救荒○八月壬辰朔 召右議政姜孟卿左贊成申叔舟與當直承旨韓繼美議世子服藥僉知中樞院事余守溫藝文直提學韓繼禧掌令任元濬內醫等與焉○傳旨吏曹曰起復前掌令宋文琳○戶曹啓前此三品以下宗親隨其散官准給科田今考吏曹受教近年以來累蒙 恩命例授五六品職者或階至彰善隨資給祿至為猥濫一從詳定職秩改正給祿請科田之數亦從祿科前所加受者還收 從之○癸巳召議政府右議政姜孟卿左贊成申叔舟都承旨韓明澮左承旨曹錫文左副承旨韓繼美直提學韓繼禧掌令任元濬及內醫等議世子服藥自是每進藥孟卿等皆議定○左正言吳凝將本院議啓曰宋文琳遭繼母喪纔經數月乃令起復為賑恤使從事官救荒之事既有賑恤使則從事官雖非文琳亦有人矣且起復非常事前者洪允成起復為都節制使此則委方面重任不得已爾如從事官豈不得已者乎 從之○以世子疾遣行上護軍金守溫于昭格殿

行上護軍李重于松岳行上護軍李廸孫于紺岳判書雲觀車
梁誠之于大井判司宰監事成任于德津楊津德積島降香祝
祈禱○吏曹啓會奉 傳旨革順興府臣等叅詳春秋之法治
亂賊必嚴於黨與順興吏民從瑜謀亂神人所共憤天地所不
容治之不可不嚴只革其邑未足懲惡請將土地人民並屬豐
基郡破其倉庫館舍夷其基址且其戶長記官將校之為首者
叅掌官事而當瑜潛通雜人之時慢不加察遂成兇謀尤宜痛
懲請全家屬江原道殘驛吏以嚴天憲 從之○甲午 御札
傳旨戶曹曰在前逐段定稅故一野之內奔馳賂事者免稅不
能賂事者不免此明白已然之弊也後立貢法以一道一邑定
稅山野之肥磽不同後又立分面定稅之令亦未精焉予自潛
邸熟聞民瘼今後分山野定稅○乙未 兩殿率世子移銜于
本宮以兵曹判書洪達孫為左廂大將知中樞院事楊汀右廂
大將結陣于本宮 仁右夜授同副承旨金礪宣傳牌巡視軍士
○聚僧鄉四人于內西廳祈禱○兵曹啓外方守令禁鄉吏習

射者有之請令勿禁 從之○丙申 王世子疾未愈宗親及
議政府六曹中樞院堂上書筵官等問起居自是逐日間起居
○丁酉 傳于義禁府曰亂言罪囚內順興事干人則情迹已
著不可輕議其餘罪囚若有輕者則速決放母使滯獄○戊戌
臨瀛大君璆以問安詣行在所門者拒而不納璆反覆曉諭亦
不聽璆遙達其意 上召大將洪達孫楊汀問所以拒之之意
達等啓曰當初 移御之時取旨凡禁軍宿衛一如行幸例
無標信者不得通行故如此耳 上曰當移御時予以世子病
凡事不得關心未暇省焉今後大小人真及一應出入者依宮
城門例○夜半大雨 傳于承政院曰人之居水邊者近因久
旱不意水至不無漂沒之患其令兵曹漢城府知會布置○己
亥京畿廣州人蔡任孫告故護軍盧湜妻發不道之言三一曰
時運倒置秋霖過多一曰從甥宋 壽以謀反五次考訊是可
憐也一曰上擢用賤人為良妻以良女及見踈棄又曰吾與湜
妻爭田今已三年 上命義禁府保管鞫之○傳旨刑曹曰以

外方住籍沒奴婢賜臨瀛大君璆永膺大君琰各十口桂陽君
璿義昌君玗判內侍府事田昫各五口○伴送使戶曹判書朴
元亨啓臣據事目就審義州烟臺沿革便否州南烟臺凡七自
城中統軍亭烟臺距七里有造山又十里而有吳彥基又三里
而有也日浦又四里而有古靜州又十里而有光城又三里而
有麟山又四里而有歧城州北烟臺凡五自統軍亭距三里而
有九龍又四里而有石階又十里而有水口又五里而有松串
城北則賊路不遠侯望最緊不容輕議若城南則賊路隔遠且
四十里相望之間列置七臺不可虛用燧卒請革造山也日浦
光城三所烟臺從之○兵曹啓今年下三道甚歉若水陸軍
丁流亡則弊將難救請令觀察使守令曲加賑恤毋致流亡如
有不待已就食他邑者限來年麥熟所在邑給路引就食其中
當番上不現者加律論罪永逃軍籍者及知情保納者依軍令
擅進退條施行守令不能檢舉者亦加律科罪又啓前此衛將
部將遞番時所帶之牌不宜私相授受請自今出番者還牌子

內代者亦待賜牌方許直宿。從之。○庚子世子疾小間。○傳
旨吏兵曹曰桂陽君瑄右議政姜孟卿領中樞院事尹師路左
贊成申叔舟大將洪達孫楊汀都承旨韓明澮左承旨曹錫文
右承旨尹子雲左副承旨韓繼美右副承旨權摯同副承旨金
碩行上護軍金守溫兵曹叅議權愷知兵曹事權權及行宮入
直都鎮撫衛將族親中一人加一資入直兵曹郎官鎮撫宣傳
官部將司僕官負宿衛軍士及凡諸侍疾者各加一資資窮者
族親中一人加一資任元濬趙資。○辛丑賜桂陽君瑄右議政
姜孟卿領中樞院事尹師路吏曹判書權摯左贊成申叔舟都
承旨韓明澮犀帶各一腰。上御西廳瑄師路孟卿叔舟洪達
孫楊汀明澮曹錫文尹子雲韓繼美權摯金守溫韓繼禧任元
濬等入侍。命賜酒。命明澮帶犀帶行酒以錫文勾當都承
旨公事。賜入直軍士酒。○傳旨吏曹曰行宮入直司饗忠苞
衛別坐五衛醫負義禁府郎官大將所從事官掌漏官負尚瑞
司繕工監官負醫書習讀官及親功臣等各加一資資窮人從

自願遠近族親中一人加資後次加資時并計前月數○壬寅
慶尚道經歷趙元祉問世子起居○癸卯承政院奉 旨馳書
于八道觀察使曰今救荒方緊毋遣首領官問安○教議政府
曰兵曹判書鄭淵漢城府尹金侁之右副承旨權摯觀察使李
禮孫節制使金師禹參議韓碩行上護軍權技僉知中樞院事
魚得海安撫使薛孝祖府使李師曾別監朴德山等錄原從功
臣二等判事鄭興孫孫蕃訓鍊觀使李守哲大護軍權崇厚郡
事林繼中行副司正楊繼童掌令金季老崔清江具信忠獻納
丘從直權安世正言崔宗復護軍黃保身李直卿朱有斐經歷
朱伯孫護軍童玉副知申自繩行司直慶餘郡事任寬正言李
崇元林守謙行司直魯參鎮撫具致明郡事鄭自洋判官楊淵
郡事鄭沃卿司直邊尚聘副使周新命判官金兩畝博士金賤
縣監崔渚尹志副司直全泰山別坐崔承靖行司直安至善崔
有江部令柳悅行司直全繼孫副司直李好山別坐趙云從崔
玉潤李重連南孫禹繼忠趙嶽崔致兩縣監周鳳鳴行謁者宋

貫行副司正柳培務功郎尹誠前司勇李魯生啓功郎李洵承
仕郎李繼榮錄事河淵明宣務郎全五常務功郎金繼朴張有
誠鄭賀孫行注簿崔漢姜繼善方繼忠務功郎仇慎司直安克
辨縣監李調元司勇成允文高台輔司正許孫司勇柳仁老行
司正李有黃通德郎鄭復通善郎張自學奉直郎李從衍注簿
金孝宗宣務郎李陽山司正金丁通仕郎李思明從仕郎廉承
原行司正權塘司正金楊秀行司勇張自綸承義校尉嚴孟義
行副司正康孟理錄事房恂文別侍衛崔津錄事李孝祥書房
色金佛從視日高允赫通仕郎崔致善副司正李承旭隊副申
萬年隊長金俊行司勇趙德生承仕郎李務敬隊長金善飯監
金乃崔壽丁典吏朴忠恕黃彥中司勇李承祖奴李春敬別監
尹寶學生吳孝貞簡文質李梅內資奴吾磨知別監姜元萬抄
山胡韓得仁直長崔承宗尹崔允亨判事吳軸尹宋休明少尹
宋盤尹利護軍李孝碩孫叙上護軍尹俱萬戶宋傳副典畿盧
孝恭少尹南倫判官朴保錫注簿安寬厚趙孝生禹孝新金仲

老姜叔卿金貴達朴思賁姜安福姜循李永蕤判官鄭麟踵李
昫趙云恭權虞注簿李潤兼注簿申子儀金臨注簿宋瓊鄭知
牟洪甄金承重行令閔慎之行副司直柳德盧湜辛斯鳳朴弘
信副司直鄭義孫行司正柳之信行副司正南陸池渾行司直
柳宗姻行司正崔德紹行司勇朴紹祖別坐朴欽金理直長邊
定錄事崔延年吉仁種閔忠達直長洪濟牟李謀副直長李云
碩兼直長李垓行副丞尹季殷行丞李慎孝學生李興達驛子
許得進李哲錄三等○甲辰領議政鄭麟趾以年老衰病上狀
乞骸骨 上不允御札各曰予方倚以待豐亨豈敢勞之宜念
艱屯卧以治事麟趾文章才望冠一時性亢直論事不少自貶
屢見斥外殊無難色嘗至 上前語及設利雨花之異麟趾曰
百箇設利不活一貧民且南方今旱赤地十餘邑臣願雨雨不
願雨花 上曰妄哉是翁醉矣因 命子顯祖扶出顯祖曰尊
公何為哉是言也麟趾曰阿兒安知老臣不言誰當言者○乙
巳傳旨吏兵曹曰為國亡身者之後特加錄用○御札諭全羅

遂觀察使宋處寬曰卿以長官違傳旨上寺作擾擅罰僧人
是何意耶然則誰順傳旨以卿有夙識惜才故特赦之後宜謹
慎○傳旨司憲府曰李崇之除全州府尹憚於外任以妻病為
辭欲於近地換差故曾命除挈家赴任今已閱月猶不之任且
用人皆自予而崇之以下情不得上達詔吏曹自占留守之職
往見權門阿私曲請殊無臣子敬上之意昵於嬖妾踈薄其妻
至於歐打侵虐家道失序可離異其妻收告身發配外方○持
平慎先庚將本府議啟曰伏覩傳旨配李崇之于外方然今
上親攬庶政而崇之阿附權臣至曰下情不得上達崇之本無
才德位至資憲上恩已極猶不滿意憚於外補非特此也踈
其正妻至於歐打大毀綱常不可不懲請問其罪上不允先
庚更啓不敬至此而不訊則後無懲戒者不久○以尹師路
領中樞院事權學判中樞院事韓明澮吏曹判書洪達孫兵曹
判書金光晬開城府留守金淳吏曹參判魚孝瞻戶曹參判沈
洪奉石柱同知中樞院事金連枝司憲府大司憲曹錫文齋承

旨尹子雲左承旨韓繼美右承旨權攀左副承旨金碩右副承
旨鄭軾同副承旨金吉通金智僉知中樞院事趙瑾姜子平司
憲掌令○諭慶尚道觀察使李克培曰用雜草紙者欲除民弊
也今見八道啓本紙厚且廣無亦反成弊耶又謂造作不慣抑
民未知利耶鄉自來熟知予心今後勿用厚紙又詳達民心好
惡便否○戶曹啓京畿忠清全羅慶尚道諸司所納歲貢之物
及田稅所出貢物內限今年蠲減者及限年蠲減者今具以啓
請田稅所納貢物若位田所出並以皮穀州倉收納來戊寅年
貢物亦於本年秋成收納 從之○戶曹啓京畿及下三道今
因旱饑餓流移者必多赫特丁戶脫漏恐有彼此不及轉于溝
壑者觀察使守令凡干荒政曲盡措置使各按堵毋致失所其
中不得已挈家就食他道他邑者告于所在邑受路引其所至
處憑考立簿安接待麥熟許復本家又欲往他道他邑索糧以
養老稚者亦給路引許令往還違者加等科罪 從之○傳旨
吏兵曹曰行宮諸事掌設禮賓寺內膳寺尚衣院沉葺庫司膳

署香室書雲觀官負司僕寺祿官祈禱祭諸執事及內醫院劑藥提舉助教等依行宮入直軍士例加一資○丙午禮曹啓咸吉道霪雨不止請降香祝及幣祈晴于名山大川雨若不止令其道觀察使擇吉行祭從之○丁未命杖宋珪壽一百永屬遠方官奴籍沒家產妻及子女珪壽永屬處屬官奴婢完聚餘應緣坐者勿坐○平安道都節制使柳河辭賜鞍具馬一匹劍及弓矢等物賜都鎮撫洪有江弓矢○傳旨義禁府以亂言被告全州人田者古未守明等放遣○己酉還宮中宮及世子留本宮命右承旨韓繼義直提學韓繼禧左弼善任元濬調護世子夜四鼓元濬來啓曰世子稍未安○傳旨義禁府曰肅川官奴永屬韓存全義金慶善金洽川寧崔致敦成川李貴存林川李得茂聞慶姜希敬息津金孝孫放遣○庚戌平明駕幸本宮命花川君權恭知中樞院事朴薑為大將○持平慎先庚將本府議啓曰宋珪壽謀逆雖耐杖不承然既為家長豈不與知今只為奴得保首領請置於法不允左正言

吳凝亦請置法

不久○宗親議政府堂上問世子起居○

辛亥臺諫復請置宋珰壽於法

不久○傳旨義禁府曰堤川

安置孟規仲規羅州安置李承尊長興安置李義碩成川安置
金海甲谷城安置趙銘等下三道內從願移水屬槐山付處金
莊哲金性今結城付處鄭山大興付處玉赫近恭初才海南付
處金兩金芝生稷山付處從恭溫陽付處卜守鎮川付處石丁
珍島付處朴回巨濟付處朴參泰仁付處內隱伊內隱德等下
三道內從願移付處○壬子司憲府大司憲金連枝司諫院
左司諫金從舜等上疏曰臣等以宋珰壽罪犯大逆宜置於法
累瀆 天聰未蒙俞允復冒昧以聞臣等竊謂大逆天地所
不容凡民罔不慙珰壽之於權完本聲勢相倚之人權完陰謀
不軌罪惡明甚既伏其辜珰壽素蓄異心往來潜通其形迹亦
已宣著今特從寬典是珰壽權完罪同罰異甚為不可去年六
月之變珰壽之家具餅饌通于淫祀咀咒之所事端既露乃置
而不問脫漏罪網得保首領一國臣民罔不共憤今又不悛舊

惡與賊臣權完私結黨授迭為唇齒蹤跡詭秘其懷貳心已皎然矣此而不誅將何所懲傳曰人臣無將將而必誅又曰罰不當罪為惡者無所戒伏惟 殿下特回剛斷置玆壽於法以正邦憲不勝幸甚 御書曰前事已赦後事不服且予舊識此亦足矣○傳旨刑曹曰靈光永屬婢仲恭賜都承旨曹錫文延安水屬婢德非古阜永屬婢古史賜右議政姜孟卿昆陽永屬婢莫今賜雲城府院君朴從愚任實永屬婢心水賜領中樞院事尹師路平壤永屬婢性德梁玉妹厚存賜坡平君尹巖安邊永屬婢於應伊濟州永屬婢栢州賜花川君權恭靈光永屬婢松伊賜前判樞中院事李季甸稷山永屬婢梅花李石貞妾女小恭賜判中樞院事李澄石玉果永屬婢春月成勝妻女性今賜左贊成申叔舟成興永屬婢銀恭賜右贊成黃守身文化永屬婢玉今友直女子無心賜判中樞院事權擘李澄玉妾女哲今賜判書韓明澮靈光永屬婢玉京賜判書權躡忠州永屬婢未致賜判書洪達孫閔仲妾女玉真賜知中樞院事朴薑高山永屬

婢欣加伊李老女諫祜賜都節制使揚汀永興永屬婢夫靡他
梁玉妹閑存賜都節制使洪允成咸安永屬婢小祜成勝妻女
玉童賜判書朴元亨吉州永屬婢寶今金尚忠女子尚祜賜
判具致寬大興永屬婢於屯李老女子李祜賜前大司憲崔恒
珍島永屬婢召史趙完珪妻女玉今賜判內侍府事田昉錦山
永屬婢召史賜前提學尹士昉權自慎妻女未致賜府尹柳洙
吉州永屬婢定祜俞應孚妻女還生賜同知中樞院事奉石柱
雲峯永屬婢奇德李末生女子石祜賜府尹康袞牙山永屬婢
寶德賜都節制使柳河康津永屬婢若祜賜觀察使元孝然蔚
山水屬婢欣德賜中樞崔濡全州永屬婢漢祜賜參判黃孝源
金海水屬婢祜祜只賜左承旨尹子雲結城永屬婢於屯賜右承
旨韓繼美權策妹召史賜參議曹孝門長連永屬婢延香賜右
副承旨金磧傳川永屬婢者斤伊賜參議權愷江界永屬婢全
伊賜提學鄭守忠婢順祜賜上護軍柳淑南原永屬婢吳祜賜
判事柳泗金堤永屬婢內隱祜賜大護軍安慶孫泗川永屬婢

水老賜上護軍趙得霖錦山水屬婢小斤伊賜副正洪順孫真
寶水屬婢春伊賜節制使鄆連城康津水屬婢內隱伊賜前護
軍崔潤○傳旨司憲府曰放水春付處李耕老安岳付處慎仲行寶
城付處柳紳○癸丑宗親議政府六曹堂上書筵官問世子起
居○慶尚右道處置使韓終孫辭 賜鞍具馬一匹大小刀子
及弓矢○臺諫啓曰宋珩壽前年黨逆特蒙免放 上懇至矣
今又潛通亂臣權完情迹已露以罪大忍死不輸情請據法斷
罪 不允○賜左廂大將權恭右廂大將朴薑各鞍具馬授右
承旨韓繼義衛將牌留衛本宮還景福宮○司諫院啓吏曹佐
郎權以經李文煥通禮門奉禮安訥漢城叅軍成允文等代受
行宮八直人別蒙資級朴雋金孟詮李昌胤崔涵等謂不切於
已得恩命私自與人非惟官爵猥濫士風不美請奪監受之資
並推鞠 命勿論○甲寅刑曹啓丹陽囚鄭破吐朴間等同謀
毆殺金乙生及妻子奪其馬并馱載之物又新昌囚同叱金刃
殺私奴末同奪其馬匹罪並斬從之○乙卯 幸本宮 命花

川君權恭知中樞院事朴薑為左右廂大將○觀稼于西郊日
脯 駐輦本宮小頃 還景福宮以日暮 賜扈衛軍士飯○
御批示承政院曰駕前人等皆抱恨欲訴故優受親理然不宜
爭入輦側其令兵曹預勅步牌勿納若有歐曳致傷則罪步牌
在仗外則勿逐○左司諫金從舜將本院議啟曰吏曹佐郎權
以經代受同生妹夫資李文煥代受六寸弟資以政曹郎官請
於軍士代受其職志操卑陋請改正以正士風 上曰不然此
持以政曹郎官而言耳若盡刺舉代職者豈特此二人哉且安
知不出於其人之情願而遽謂之請托乎從舜更啟非親子弟
而代職豈真情願哉受人之賄猶謂之貪况濫求官爵者乎以
政曹郎官代受軍士之資可恥之甚而公然為之是可為也孰
不可為也况臺省政曹朝廷重選其人如此而不改正則貪墨
之人何所懲乎請須改正以廉貪夫 上曰百官加資非計其
功勞而爵之近日移 御時直宿朝士軍士別加資級者乃特
恩也以特恩代授他人不亦通乎爾言雖是實亦不通○知中

樞院事趙瑞安卒

賜賻紙一百卷

油氈五部棺槨等物謚平

肅執事有制平剛克為伐肅○丙辰遣工曹參判黃孝源中樞院

副使金澣奉表箋如大明賀

聖節千秋節○中宮還景福宮

○掌令姜子平石正言李淑城等將本司議啓曰宋玆壽謀逆

至於再三罪不可赦臣等累瀆

天聰

傳曰予其商量退

而待

命有日臣等反復思之不可不置之於法

傳曰玆壽實

迷惑人也謀逆非玆壽所能為也且人不服辜而誅之可乎子

平等啓曰玆壽於近日事雖或不知前年六月之變與知審矣

且玆壽之心以為等死耳寧死於杖豈以不服而釋大惡乎

傳曰殺人大矣

不免○夜半

命授人標信往本宮守門者

堅禁使不得入告于部將而後納之

上聞之以

御札示衛

將部將曰所謂通行標信者雖賤肆柴夫守門者莫得呵禁今

聞本宮鎮守門者堅執持標信者而告于部將然後許入此乍

看則似乎確細看則甚不通何則若百萬為陣柴夫數十萬及

時樵蘇部將其能一一出令然後許其通行乎若皆聽部將之

令則無標信有標信有何味哉况此議藥趁時緊關節目妄用
兵法必誤事幾矣爾兵曹急諭兵法正宗○丁巳韋本宮而還
○戊午 御思政殿賜佐翼功臣左議政鄭昌孫等錄券仍設
宴讓寧大君禔孝寧大君補永膺大君琰敬寧君排誠寧君罔
益寧君穆桂陽君增義昌君玗密城君琛翼峴君璉寧海君瑋
雲城府院君朴從愚鈴川府院君尹師路坡平君尹巖花川君
權恭松峴正堅信河東府院君鄭麟趾蓬原府院君鄭昌孫晉
山府院君姜孟卿梁山君李澄石高靈君申叔舟南原君黃守
身吉昌君權擘上黨君韓明澮及諸功臣承旨等侍宴○己未
大司憲金連枝左司諫金從舜等闔司啓曰宋玗壽罪在不赦
今者罰不當罪請置於法 傳曰既已生之何復殺之勿更啓
連枝等更啓罪玗壽非國家也玗壽自作大罪因其罪而罪之
耳事干大逆而不置於法則逆黨何所懲乎請殺無赦 傳曰
覈玗壽未竟不可殺也○庚甲 駕幸本宮而還○兵曹啓今
奉傳旨直宿軍士遠近族親中願代投資者聽然軍士則不計

資級呈都目陞品授職故以加資為無益雖非族親妄冒代職者間或有之不但如是秩高者反求秩卑軍士之資卑士等亦以官爵容易與人非惟猥濫士風不美請自今族親內職秩相當若秩卑者外勿令代授從之○辛酉幸本宮議政府六曹問世子起居命花川君權恭知中樞院事朴董為左右廂大將作陣宿衛本宮授都節制使楊汀大將牌守景福宮○大司憲金連枝左司諫金從舜上疏曰臣等近將宋瑄壽罪狀累瀆天聰未蒙俞允反覆思之瑄壽以犯至重不可輕斷敢復昧死以聞臣等竊謂罪干大逆法所不赦考之律文不分首從無減等之文瑄壽於往年兇徒反逆之時與聞其謀事端已露殿下特貸而赦之今又與權完潛結黨援罪惡已著殿下又貸而寬之瑄壽再犯大逆殿下再赦之其於討賊懲惡之典何今若以瑄壽不服其辜不宜置法則彼自知其罪逆深重期以必死五次訊杖之後不加鞫問豈即輸情再犯亂逆罪惡章章非曖昧疑似之比也伏願殿下斷以律文以副一國之

望○傳旨義禁府曰水原任內龍城船軍金吾乙亡比安學生
李孟德鎮川船軍朴成等并告者放遣○命放李崇之勿離異
其妻

世祖惠莊大王實錄卷第八

臣等謹將六王寶錄卷八

其表

○勅諭... 軍林... 詔... 旨... 欽此

(B)
732.55
4724
[v.7]
no.3
0163740

昭和五年十月五日印刷
昭和五年十月十日發行

(景李朝實錄太白山本)

京城帝國大學法文學部

京城府蓬萊町三丁目六十二番地

印刷所 朝鮮印刷株式會社

(B)
732.55
4724
[v.7]
no.3